

明詩紀事

戊籤

王教 一首

教字庸之祥符人嘉靖癸未第二人及第授編修遷
侍讀歷左諭德國子祭酒進南兵部侍郎有中川遺
稿三十三卷

巴江詞


皎月上巴山影入巴江裏不見郎舟來江流去瀾瀾

徐階 六首

階字子升松江華亭人嘉靖癸未第三人及第授編



田輯



修以論孔子廟制謫延平推官遷黃州同知擢浙江
按察僉事進江西副使召拜司經局洗馬歷國子祭
酒擢禮部侍郎改吏部進禮部尚書加太子太保進
少保兼文淵閣大學士參預機務再進柱國兼太子
太傅武英殿大學士加太傅改吏部尚書加太子太
師進少師建極殿大學士卒贈太師諡文貞有世經
堂集二十六卷

千嶺行穀山筆塵分宜相嵩既殺貴溪逐諸城專任
二十年獨華亭與之左右勢且不免會吳中有島寇
華亭既卜宅豫章伴爲避寇之計有司爲之樹坊治
第附籍江右又與世蕃結親江右士大夫皆講鄉曲
之誼於是分宜坦然不復介意已而謀逐分宜世蕃
誅死卽鬻南昌里第解江右之籍
國史唯疑徐華亭初以爭孔子祀典謫外斥爲佞
柱識之曰徐階小人永不敘久亦遂忘之其自江右

督學改宮寮賴馮恩力馮時謫戍過南昌代都御史
何某草疏達夏桂洲因被內擢躋台輔謂君相能造
命非歟今人處謫官邑邑不樂徐華亭延平詩云俗
樸到庭文牒少山深入饌蕨薇鮮自注予往歲謫延
平樂其土俗有移家之約窺此老襟度正復超然
田按文貞相業以威福還主上以政務還諸司以用
舍刑賞還公論雖不盡副自是名語永陵修玄非青
詞不能結主知又與相嵩共事權諸獲濟史稱任智
不其然歟世經堂集爲所手定一切青詞致語刪削
殆盡雖不以詩名而入格之篇彌復俊爽

詠古

漂母昔進食慷慨不願酬淮陰千金賜高誼激頽流悲哉一
失職怏怏生異謀隆準多忌猜國士諒所仇一飯有厚直高
勳無荒邱感彼君臣間涕下不能收

送潘子芳赴東陽簿子芳者少宗伯崔公璿也

我初識君自崔公珠玉照坐挹清風得君高文不能薦俛首

簿領山縣中人生仕宦如艇子東西總在風濤裏篙工舵師
好身手要使風濤爲我使古今貴賤同一邱獨有賢者名常
留如令人頌東陽簿此事應輸君一籌

題西莊卷

問訊高人第城西莊更幽竹深秋靄合花重夕陽留澗水斜
通泖雲峯曲抱樓不知塵世外何處有丹邱

登金山作

嶺樹鬱重重江流接太空下臨三楚盡平挹兩都雄寺古仙
靈祕潮生海脈通無勞問天塹萬國正來同

送客赴雲中

霜月滿層城憐君事遠行平沙百戰地羸馬一書生漢戍雲

邊色胡笳雪裏聲相思堪涕淚送別若爲情

送少傅木齋先生謝公致政

旌蓋催晨發煙霞入望新寵恩黃閣重心事碧山親司馬眞
辭位留侯早乞身繫維虛夢寐瞻望渺參辰大節全終始神
功付隱淪鳳飛元快覩鴻舉定誰馴柳暗龍泉雨花明蘿壁
春笑歌淹日月步履出風塵勲業清朝範文章奕世珍高標
振遐軌懷企獨傷神

潘恩 二首

恩字子仁上海人嘉靖癸未進士授祁州知州改鈞
州遷南刑部員外出爲廣西提學僉事遷山東副使
以事謫廣東河源典史累遷浙江參政進布政使以

右副都御史巡撫河南召拜刑部尚書改左都御史
贈太子少保諡恭定有笠江集

張時徹芝園定集笠江詩型範自然體裁各適
田按尚書詩有陳色錄其少新穎者

樓子石

疊磴鬱棱層白色籠雲氣天迴石鏡光風捲珠泉
佛仙人好樓居飛軒下來未

三人蜀過灩澦

灩澦已如象川行良自傷一官淹絀冕三人戀舟航
大浸蛟龍鬪天風鶴鶴翔嗟嗟遠遊子能不念垂堂

鄭曉三首

曉字空南海鹽人嘉靖癸未進士授兵部主事以爭

大禮廷杖改吏部歷郎中以忤嚴嵩謫和州同知遷
太僕丞歷南太常卿召拜刑部侍郎改兵部兼副都
御史總督漕運入為吏部侍郎遷南吏部尚書改右
都御史再改刑部尚書隆慶初贈太子少保諡端簡

有集十二卷

田按端簡博通掌故所著吾學編今言九邊志悉可
奉為典要詩非所長紀事之篇風藻不匱

諸將三首

嘉靖辛丑

胡馬南驅摧紫塞材官北面守黃河風塵不斷千山動
渾脫相牽一羣過

胡兒落雁誇鳴鏑元帥椎牛賽齋牙冀北於今驚趙魏
河西且莫問瓜沙

騾騎未搜青海賊匈奴還結黑山奚朱旗夜躡雙城破白骨
秋燐萬鬼啼

朱廷立 二首

廷立字子禮通山人嘉靖癸未進士除諸暨知縣入
爲河南道御史歷南太僕少卿擢工部侍郎改禮部
有兩厓集十一卷

懶谷

山盡若無去處青松翠竹交加風動茶煙初起隔林知有人
家

山樓短述

病暑山城一月餘竹床茗碗爲驅除澄心自是延年術誰向

名山借道書

屠大山 一首

大山字國望鄞人嘉靖癸未進士授合州知州遷南
刑部員外出知吉安府歷山東按察使參政福建布
政使以右副都御史巡撫湖廣召拜工部侍郎以原
職再撫湖廣進兵部侍郎兼僉都御史總督湖廣川
貴軍務改南兵部侍郎巡撫應天與倭戰失利下獄
黜爲民有集

甬上耆舊集屠長卿曰公歸田後與里中故人縱飲
酒酣以往援筆爲曼歌了不求工而往往往神來非詞
人嘔心枯影而得

青州瀑布泉歌

山神愛奇天帝憐倒捲海水懸山巔海神欲爭不敢言怒觸
山頂通黝淵白龍騰攫挂紫煙飛聲兩道雲光鮮山神受聒
忘晏眠徒置十里蒼崖肩坐令林麓偉麗捐頗費探討添煩
寃我來聞此心冷然歛裳欲訪塵霧牽望中彷彿瑤幕寒冰
肌玉骨爭清妍誰能移還大道邊報爾萬鎰黃金錢

李仁十首

仁字元夫東阿人嘉靖癸未進士授行人擢吏科給
事中累官兵部侍郎有吾西遺稿

海岳靈秀集吾西清婉和粹有中唐餘韻
田按吾西詩格軒爽音節清脆當時山左盛稱伯華
懋欽爲二李何獨遺此元珠

湖行書所見

葭菼煙中界茅檐水上村漁舟常繫柳鷺渚不離門愛爾機
心息知予野性存炎天供遠役惆悵與誰論

過高郵湖

郡接三吳會湖涵萬派流樓虛無地著岸闊與天浮細柳魚
蝦市香蘋雁鷺洲孤舟蕩超忽真得水雲遊

送劉竹瀧赴西甯

曲水高旗駐離筵急管催驅車川路永吹角隴雲開青海霜
鷗擊流沙天馬來百年番漢地坐見古風回

別約齋龔丈

同作羈栖客如何復轉萍高人甯避毀吾道本無爭草綠思
公子雲停悵友生幾時清禁地端簡笑相迎

出塞

羽檄來青海朱旗向積沙匈奴猶牧馬主將敢言家天接胡
塵暗山連漢戍斜鐵衣寒不寐徹夜聽鳴笳

朝天宮東麓亭

飛閣東巖麓遙憑修竹林河山窗裡盡宮闕望中深晞髮迎
朝日鳴琴坐夕陰便當從綺季一洗市朝心

寄張五臺

明時張博望遠佐霍嫖姚直以戎機重甯辭邊地遙油幢張
晚甸刁斗入寒宵雄劍衝星斗機槍觸處消

疊川雨中宴集

小亭張畫燭高宴紫薇衙細雨江雲溼微風徑竹斜青衣行

琥珀翠袖拂琵琶歸路衝泥怯籠街引絳紗

澠池重九

函谷關西山路長會盟臺北野雲涼雁傳朔氣清霜苦地近
寒流晚稻黃木落前川還獨往花開別縣又重陽薊門直上
三千里一夕歸心鬢欲蒼

慶陽

慶陽山郭屹中天勢壓胡兒不近邊何事白狼鞮未入至今
青海箭猶傳城頭帶甲嘗防虜套裡連營自控絃漢將秦師
空拊髀令人卻憶孝文賢

李舜臣二首

舜臣字懋欽青州樂安人嘉靖癸未進士授戶部主

事改吏部歷員外出為江西提學僉事改南國子司業就遷尚寶卿召拜太僕卿有愚谷集十卷

四庫總目舜臣詩格雅飭而頗窘於邊幅所長所短皆在於此文皆古質其序記多名論而西橋逸事狀一篇觸張聰桂夢之鋒直書不諱文出之日天下咋舌抑亦剛正之士矣
中麓間居集李空同有九子詩率多詩文之友子亦有友九人焉詩文而兼經濟者也勿論經濟其詩文有可掩蔽前九子者焉李思谷舜臣劉嵩陽繪羅念菴洪先呂江峯高熊南沙過唐荆川順之趙俊谷時春王遵巖慎中潘春谷高

送丁德卿出守撫州

康樂臨川日江山屬壯遊羨君今出守於此復鳴騶地以紅泉勝亭餘碧澗幽遙知詞賦手千載指風流

寄任元朴

去國今三載獨傳諫諍名聖朝非爾棄時俗乍相傾迹向陶邱歛書從梁獄明平生欲何似歲暮臥山城

陸銓一首

銓字選之鄞人嘉靖癸未進士除刑部主事諫大禮廷杖歷兵部員外禮部郎中出為福建按察副使歷廣西按察使遷廣東布政使有石谿集

甬上耆舊業石谿奇氣激亢真詩家之鳥獲田接選之議禮與羅峯不合羅峯驟貴氣凌朝士排擠正人選之挽羅峯詩云此後正人方貼席從前同黨幾張弧笑君十載為公相不得徐生一束芻可謂快論也

度嶺後漸寒

初春戒羊城氣暖親絺葛度嶺春已杪怯風襲冬毳相去千

里間寒燠判如割物性亦從人宜土乃易茁橘柚常去燕梨
棗不榮粵植根一失所生意已先闕奚為冠裳驅風土奪所
悅六氣為人讐變息苦伺隙行行歸吾鄉安栖養歲月

顧夢圭 四首

夢圭字武祥崑山人嘉靖癸未進士授刑部主事改
南吏部歷郎中出為廣東參議改江西歷山東河南
副使福建參政按察使遷江西布政使有疵贅錄二

卷

四庫總目夢圭詩文皆平正通達直抒胸臆無鉤章棘
句之習有明中葉風氣初更蓋學問移於姚江而文
章未移於北地者也
田按武祥分守廣東雷廉海北故有平江青鸞楊梅
樂民四珠池詔書督採甚急武祥疏言海面珠池道
里遠絕往歲開採用舟筏兵夫萬計往來海中因以

為盜近年劇寇黃山秀蔓延縱橫覆轍可鑿且珠蚌
出海有漸生息甚難先朝率十五六年或十年一採
始得美珠邇者三年再採珠已耗竭自非積久欲得
美碩繁顆必不可得之數矣况蠶戶腰絛入海觸犯
瘴霧駢首就死實可憫念伏望亟賜罷採以寬民力
不報責貢如初武祥有采珠歎詩云漢家嬪嬙無麗
飾南海道遙養泉客昭陽新寵門新妝照乘之珠苦
難得孟嘗美政龔黃班今人反怨珠來還璽書三年
兩頌降驪龍赤蚌皆愁顏往時中官涖合浦巧徵橫
索如豺虎中官去後璽書來誰訴邊陲無限苦野老
村童不著禪四山戎馬夜紛紛竹房無瓦併無粟猶
折山花迂使君此詩可儷白香山新樂府矣武祥疏
贊集長於古體如潮縣行獻縣行等篇皆可採之輜
軒陳之太史者也

崇安縣作

鷓鴣湖始寒帷延矚情未已陟嶽窮紆折臨溪鑿清泚修篁蔽
雲厓繁英間霞綺飛瀑萬壑鳴玄關百靈啟征夫憚殊域物
色差媚美緬懷通道初於今乃同軌言瞻九曲間秀石如瑜

珥鼓榘日紆徐仍觀巖月起

獻縣行

滹沱水決年復年城北一望皆平川田荒不聞免租稅賣兒
鬻女償官錢百家今無十家在老翁臘月衣無綿編草爲船
渡行客破履深入層冰間索錢買餅不充腹終委溝壑何人
憐北地凋殘此爲最來往况復多輻軒我來正逢貴者至橫
須供張何喧喧辛勤爲民省百費路旁但稱曾合賢曾合名
德字曰宣

過信陽追悼大理卿孟公

江東舊游處雲樹俱寂寞篇翰空流傳斯人不可作嵩山洛
水幾俊人此鄉何孟名嶙峋東閣梅花罷吟笑落帽龍山迹

已陳我昔卑棲向南省孟也邂逅情相親秦淮命舟每清夜
冶城飛蓋當芳辰歡娛未幾旋相失楚天粵嶠疏音塵英魂
不逐彩霞散或與黃鶴翔秋旻我來故宅可羅雀墓草忽復
三經春交呂攀嵇如隔夢山陽聞笛一霑巾

九江雨泊

家近書仍少情繁夢不清芝山連夜雨春盡九江城

柯維騏

四首

維騏字奇純莆田人嘉靖癸未進士授南戶部主事

有藝餘集十四卷

東南嶠外詩話希齋登第五十載未嘗一日爲官人
品既超詩遂似之
田按奇純撰宋史新編竭二十餘年之力可謂精專
詩亦蘊藉不染塵氛

別陳若寶

悠悠江上雲盤盤澗中石蹤迹亦何常寸心詎能易長亭一杯酒相看意脈脈別後長相思留歡罄茲夕

宏路驛

雨歇江天淨山迴驛路遲客愁新歲減風物故鄉宜花事餘梅盡樵歌撥竹枝禰衡司馬病深負好文時

寄文衡山內翰致政歸山

海內論交久清朝偶共逢談詩山寺月並馬禁城鐘林卧余多病吏情爾亦慵相望隔秋水詩訊託芙蓉

九日集東山

登高直到石巖巖滿目雲山秋可憐僧影夕陽紅樹裏蘆花

野水白鷗前寒天搖落仍幽事淨社招攜有宿緣共把深杯對叢菊不妨短鬢趁流年

李新芳一首

新芳字元德長治人嘉靖癸未進士除淮安推官改保定人爲戶部主事遷監察御史有漳堃文集八卷

四庫總目新芳漳堃文集講學之作多至三卷詩亦瀛洛風雅之脈

送李容之赴密雲

東郭送行客淒其風滿樓冠裳兼晉楚意氣極燕幽對酒堃花落隔林嘯鳥愁雙旌去何疾回首北山秋

馮世雍二首

世雍字子和江夏人嘉靖癸未進士歷吏部郎中出

為杭州知府改徽州有三石集

湖北詩徵傳畧世雍書法山谷有奇氣

登岳陽樓望洞庭

澤國雲蒸水滿湖茫茫煙浪混虛無
波心明月澹將墮海上浮邱聞可呼
巴客布帆歸鳥盡湘靈瑤瑟暮峯孤
汀蘭吐蕙空相戀恐有魚龍夜泣珠

金陵春興

玉臺金闕帝王都碧樹青山海嶽圖
瘦馬年年趨畫省只將詩句詠蓬壺

劉隅一首

隅字叔正東阿人嘉靖癸未進士授福建道御史出

為四川按察僉事坐事謫稍遷永平知府歷河南副使按察使以右僉都御史巡撫保定入為右副都御史有範東集

再過草堂

亭臬叢薄帶寒流杜老祠堂江水頭
一代文章懸日月幾年衰病託林邱
空園葉落松楸老滿地雲陰鳥雀愁
我亦羈栖懷故國時來江上寫離憂

馬坤一首

坤字順卿南通州人嘉靖癸未進士累官南戶部尙書贈太子少保有石渚集

送沙溪姜二守擢清江藩府審理

三年佐郡著賢勞又上樓船汎雪濤粵檄江山歸陸賈梁王
賓客讓枚臬海東棠樹陰連舍驛路煙花色映袍把酒旗亭
愁送遠西風衰柳苦蕭騷

朱澗 四首

澗字必東莆田人嘉靖癸未進士授湖廣道御史以

言事廷杖放歸有天馬山房遺藁八卷

四庫總目澗詩不事鉛華獨抒懷抱家居三十餘年於
民生國計切切不忘集中南洋水利之議山寇海寇
之防指陳利弊樹酌時宜委曲以告當事不以罷黜
而膜視其爭誕節朝賀疏史僅刪存大畧集中尚載
其完本用以壓卷蓋自議禮諸臣獲罪後與朝皆附
新局澗與馬明衡倦倦故君尤其一生大節故編錄
遺文者別為一卷弁於集首云
蘭陔詩話損巖與馬師山同批逆鱗幸得不死歸隱
天馬自謂罷官之歲適與靖節相符園中多值菊每
開時必作數詩以紀歲月其詩春容和粹無窮愁牢

騷語雖不規撫柴桑其興趣正自相同

東南嶠外詩話天馬山房稿中有二石歌云英石出
英嶺端石出端溪天生二石名天下寶愛直與琨瑤
齊昨來端州過英德忽聽人言心惻惻窮山絕谷遠
搜尋斧鑿之聲日千百持歸不敢為家謀紛紛爭向
官司投摩挲更與辨醜好身當此役何時休二州父
母民之主詎忍生民受茲苦安得龍圖孝肅公手不
持之日不觀此等詩有關繫粵東方志中尤宜大書
而特書者也

禾稼在野人有更生之望喜而賦此

低田美禾稼高田饒黍菽豐歉昧前期苦樂易翻覆貧者嗟

已流死者不可復何當忍須臾待此歲月熟

寄竹坡施先生昆玉

尤川古邑佳山水雙峰巒岫水清泚地遠民風淑且閑漁釣
還多隱君子薄遊已作廿年期只今魂夢長依依扁舟欲往

關山阻一雁不來音信稀極目溪雲擁溪樹君遊是我曾遊
處漫題短句送君行直把愁心向君去君到尤中見故人爲
余傳語寄情親木蘭煙水壺公月短髮蓬鬆一角巾

扁舟沂木蘭宿西泚僧舍同馬師山和顧頤齋韻

坐愛山中靜庭柯永日移婆娑遊客影消息野雲知釋子何
年住溪光入畫奇題詩鑿絕壁應作後遊期

題九霄深紅菊

幾朵深紅籬畔栽幽香剛到一尊開江村秋色涼如水五柳
先生歸去來

盧襄一首

襄字師陳吳人嘉靖癸未進士官兵部郎中有五隄

山房藁

和贈頤戶部

三年再見頤叔養昔在范水今神州矯矯高姿同海鶴悠悠
野思傍汀鷗未拋薄祿緣慈母忽動新吟感素秋花竹郊居
石湖好問君還肯卜鄰不

王激二首

激字子揚永嘉人嘉靖癸未進士除吉水知縣入爲
吏部主事歷員外郎中遷南右通政改北進國子祭

酒有文江鶴山二集

田按子揚爲羅山婿羅山柄用以喜怒進退人子揚
能調護善類脫其荼毒其卒也張唯靜爲刻鶴山集
鄭澹泉爲作小傳稱其天資闊達不屑曲謹顧以舅
氏驟起驟廢坐是抑鬱以卒羅山素不喜余非子揚

禍且不測使子揚以縣令歸山潔志峻節心迹之際
憫然矣顧其意亦欲委曲盤桓救十一於千百其爲
正人憐惜如此余徧檢明詩總集無錄子揚詩者偶
於温州志獲詩二首亟登之

稼軒

太平無稿勸東封且爲明時作老農歲事經營春信後蓑衣
料理雨聲中百年自足江村味一飽麴醱耒耜功草澤行吟
君莫問遊人不是鹿皮翁

喜歸雲峯山房

江上青山入望新客衣初拂帝京塵庭闈歲晚思歸養雨露
恩深許乞身雲谷誅茅營別業鶴山煮茗摘先春莫言林下
無居士東絹新裁折角巾

黃直一首

直字以方金谿人嘉靖癸未進士授漳州推官以疏
請建儲下獄謫沔陽州判再劾邵元節廷杖戍雷州
隆慶初贈光祿少卿

羅漢洞

西風一蕭瑟暇日暫遊山花落亂鋪徑雲來半掩關流泉秋
壑冷疏磬晚龕閒興盡日歸去高僧猶未還

方一蘭一首

一蘭字世佩莆田人嘉靖癸未進士授刑部主事改

禮部吏部歷員外郎中有少微堂集

芝園定集西皋方子詩流藻繪於山川播風標於簡

留雲洞

望望瀨溪水幽幽雲峯林驅我輕車去遲日載登臨梧竹手
移植麋鹿相追尋依依青楓樹嚶嚶好鳥鳴我與寄寥廓斗
酒聊自斟解衣坐磐石撫我膝上琴他時畢婚嫁長此棲雲
岑

鄭弼一首

弼字諧甫莆田人嘉靖癸未進士歷工部郎中出知
雲南府

夜坐

獨樹風漸生四郊雨初歇何處隔山鐘聲聲帶明月

黃禎一首

禎字德兆安邱人嘉靖癸未進士授戶部主事改兵

部進郎中再改吏部有北上戶部符臺諸集

張貞渠邱耳夢錄選部以人言免官家居獨坐一小樓日事吟詠力追古作

東田

東田陟蘭皋別業山之麓夕日銜嶺頭山猿嘯東谷颺颺晚
風細輕雲澹水木曳杖尋友朋溪月上茅屋

葉良佩一首

良佩字敬之台州太平人嘉靖癸未進士除新城知
縣改貴溪入爲刑部郎中有海峯堂前藁十八卷

靈谷菴讀道書

市居甚炎熱逃住白石菴閒眠讀道書峯影垂重檐緬邈三
秀圍深沉九龍潭簫笙自幽細風日還清酣路逢王子晉引

致阿那含親昵儻相問餐霞隱終南

金克厚 一首

克厚字宏載仙居人嘉靖癸未進士官刑部郎中

遊天台

夜宿清溪覽桐柏又從桐柏上瓊臺仙人跨鶴歸何處岩下

碧桃花白開

王度 一首

度字律生臨海人嘉靖癸未進士官兵部主事歷員

外郎中出知建昌府有石梁集

望石樓

一路看山近石樓十年詩興未曾酬與君並馬談幽事何日

捫蘿到上頭綠水平田初過雨丹楓黃葉足清秋年來蹤迹
奔馳甚聊向東溟學浪遊

陳表 一首

表字口口新興州人嘉靖癸未進士官浙江道御史

東湖驛題壁

雲峯日落暮猿引江浦雨來歸雁忙南入青山六十里遙村
烟樹影微茫

吳鵬 一首

鵬字萬里秀水人嘉靖癸未進士官工部主事累官

吏部尚書有飛鴻集二十卷

次府江感懷呈劉憲使

上化灘前晚繫舟黃茅嶺接楚雲秋一天瘴雨來殘夜千里
蠻江有急流短髮獨搔搔送淚疏燈自照角添愁卻憐留滯
炎荒客已似當年柳柳州

毛衢一首

衢字大亨吳江人嘉靖癸未進士官四川提學副使
有六泉集

元旦在涪

年華催客鬢春意動山城草樹初添色溪流不換聲煖將椒
酒媚纖送菜盤青時序偏驚眼江籬愁與生

徐獻忠一首

獻忠字伯臣松江華亭人嘉靖乙酉舉人除奉化知

縣有長谷集十五卷

松風遺韻長谷集中五言如林密交加樹山迷去住
雲七言門臨絕壁高於烏竹引泉流曲似蛇別浦煙
光分蟹舍隔林晴日上魚梁殊自可誦

山居

高林深結宇礙屋有停雲秋至驚黃葉蕭蕭不可聞客從樵
徑入泉向石根分日暮牛羊下時同麋鹿羣

錢楞一首

楞字介夫臨海人嘉靖乙酉舉人官襄陽同知

春日

桃花杏花紅滿溪野老候予來杖藜斷厓水落雨初歇春晴
日出鶯亂嘯酒盃入手醉不放草色著眼望欲迷最愛南鄰

興更好攜壺擬過石關西

孟思 五首

思字叔正潯人嘉靖乙酉舉人選南陽通判未赴卒

有龍川集二十卷

田按龍川與謝四溟盧次楨遊詩名不甚著於潦倒中時有渾成合格之作

愁

計拙甯為隱年衰未得閒詩篇搔短髮歲月落荒山剝啄征
徭急尋常酒債艱昔人何意適瀨石弄潺湲

暴雨

農事欣仍懼天威暴暫迴虹邊收斷雨林外殷殘雷薄暮酒
杯進小涼詩句催西山足爽氣倚仗看崔巍

送盧次楨遊南都

秣陵春色早行客路從容酒醒江船月詩成野寺鐘鍾山雲
氣紫澤國浪花重莫聽竹枝曲令人歸興慵

雨晴

五更鳴雨忽斷絕清曉皎日懸林東坐枝黃鳥嬌
覩院落地杏花殘白紅青青麥苗抽短隴飛飛閒雲開遠空欲出山田
泥不可拂琴呼酒對春風

夜

獨坐空階對綺琴微微露下寒來侵西風落木此時夜明月
在天何處砧楚調悠悠吹遠思胡笳故故送哀音問誰今作
燕山將莫懈防秋萬里心

劉陽一首

陽字一舒吉安安福人嘉靖乙酉舉人除碭山知縣
徵授御史引疾歸起光祿少卿不赴

書岡山

獨尋花徑覓幽居借我書岡小結廬十日西風人卧病半床
黃葉半床書

明詩紀事

貴陽陳田輯

戊籤

龔用卿一首

用卿字鳴治懷安人嘉靖丙戌第一人及第授修撰
歷諭德終南國子祭酒有雲岡選稿二十卷

渡江訪陳德英中丞

曲岸橫橋通小溪溪流清淺草萋萋野花自落春歸去澗戶
無人山鳥嘯

袁袞十五首

袞字永之吳人嘉靖丙戌進士選庶吉士授刑部主

事改兵部坐事下詔獄編成湖州起南兵部主事歷
員外出為廣西提學僉事有胥臺集二十卷

四庫總目袁詩不失體格而特乏堅蒼

藝苑卮言袁永之詩如王謝門中貴子弟動止可觀
田按永之與王履吉皆服膺空同履吉未達私淑而
已永之使大梁空同賦相逢贈之空同屬續之日
遺言必哀生表墓其子伯材書乞永之作傳永之又
有悼空同詩云李公海嶽秀長庚兆靈異發穎由西
陲空羣眇北冀摘詞追英特晚達勞指示金聲叶鈞
前鴻冥陋衰季徐何抗英特晚達勞指示金聲叶鈞
詔兼總集能事煌煌弘治間文章準天地抗疏逐城
狐挺節詆閣寺入黨雖稽留二張亦歛避青蠅何羣
飛白首從吏議淮南自狂謀公也實奚累繁臺昔攀
嵇龍門幸無棄白馬吟雜談朱絃賞真趣三復相逢
行綢繆伏高義哲人竟山頽即止庶可企永之詩雄
詞快句下筆凌厲而直易之篇傷於易盡無復頓挫
含蓄之妙惟五律獨多各作其與顧華玉論詩謂四
言必以三百篇為法而取材於漢魏今玩集中此體
了無高唱欲副斯言眇若河漢矣

劉推官孟材過飲山樓

日掩山中扉忽枉府中駕登樓望澄湖列宴臨虛榭芳園榮
種葵遠洲環桑柘新篁洽風來清陰滌煩夏誦君瑤華篇逸
思騁陶謝蘭庭且獻酬焉知卜其夜

送沈山人玉父遊武夷

武夷三十六高峯層巒削壁何重重清溪九曲似明鏡曲曲
倒浸青芙蓉仙人控鶴去已杳沈生好奇快幽討禮斗壇前
吹紫簫昇真洞口探瑤草幔亭宴罷寂無聞何日虹梁度綵
雲仙籍倘書余姓字齋心同謁武夷君

邵成都仲材過飲草堂醉贈短歌

君不見石崇金谷今安在謝安東山陵谷改人生忽若草頭

露河清海變誰能待成都太守休嘆嗟當年同看長安花一
朝挂冠武林下荷鋤學種青門瓜世間翻覆無不有浮雲富
貴眞芻狗何用長存身後名祇須痛飲杯中酒君家兄弟二
陸才黑頭早賦歸去來古人往往困屠釣我輩落落俱蒿萊
西湖春來淨如鏡南峯北峯翠相映六橋煙柳隱漁舟孤山
草樹迷樵徑林逋逝矣不可攀千秋放鶴何時還與君笑傲
拂衣去流水桃花心自閒

夏日庄居

門前新漲滿恰好沒漁磯下釣驚鷺浴開簾放燕飛納涼憑
水檻習靜掩山扉蕭散無拘束林泉志不違

飲芙蓉桂花下

幽居屏人事散步窺西園愛此石上坐獨開花下尊迎風桂
子落照水芙蓉繁日入且歸去沈冥誰共言

摘星樓

法界棲隋苑星樓委廢臺高秋躍馬望遺事使人哀池想龍
舟戲堤聞玉輦來南朝歌舞地何處不蒿萊

宿天界寺半峯房

殘照已全匿空門猶半開行人失歸徑落葉厚蒼苔暝色野
煙合寒聲山雨來遠公應好客宿鳥莫相猜

靈巖

君王歌舞地樵牧使人哀土木遺危剝丹青委廢臺草當香
徑合花傍鹿場開且盡登臨興山河望裏來

登寶華諸山

夙有登臨興春遊愜賞心山盤數嶺盡寺轉萬松深樹古同
僧臘泉多雜梵音仙津何處問卽此可投簪

蓮蕩舟宴

新霽恍無暑微風宜放船捲簾親水鳥解纜惜吟蟬玉笋休
停手青房不論錢晚來花霧裏縹緲欲凌僊

送顧秋官伯從赴留都

伯也今司直西曹俗事無簿書暇日山水羨清都柳綠盧
龍觀花香玄武湖莫辭刀筆恥讀律乃通儒

送僧歸金山

高僧何處住孤錫向空飛驛樹連天盡江帆帶雨歸潮聲喧

講座山色映漁磯遙憶東林下精廬隱翠微

送慧公住持寒山寺

古寺人天外精廬杳靄中君依蓮社去心與白雲同溪水看
清淨寒山對苦空何時聽說法爲我暢玄風

東齋

楓葉紛紛落荒徑無人掃萬念杳虛寂閉門閉秋草

野步

新月生西嶺窈窕穿叢薄林深不逢人時有松子落

蘇祐

八首

祐字允吉一字舜澤濮州人嘉靖丙戌進士除吳縣
知縣改東鹿入爲監察御史遷江西提學副使歷山

西參政遷大理少卿以僉都御史巡撫保定進副都御史改撫山西徵拜刑部侍郎以兵部侍郎總督宣大進兵部尚書削籍尋復官有穀原集十卷

四庫總目祐詩音節琅琅都無新意

四溟詩話陳一菴太守謫戍瓊州每聞摺紳開盛稱蘇舜澤總制雪詩初隨鳴雨喧相續轉入飄風靜不

聞寫景入微非老手不能也

海嶽靈秀集允吉詩格不高而氣逸調不古而情真

明詩選陳因子曰司馬詩沈雄雅練邊塞之篇不愧

橫梁七律格律精嚴聲調清亮咄咄逸羣而上

列朝詩集允吉詩格豪宕近於雄渾遂謂關塞之篇其風格徒以其聲調叫號也

詠郭林宗

高張琴絕絃暗投珠委路嗟哉東都士禍樞踵危步穆穆郭

林宗深心託幽素含章貞自抱識微幾早悟懿彼烝民章明

哲伊誰賦

寄陳文晦侍御

良晤阻歡讌停雲方在茲東風吹野草綠遍瓊華池嚶鳴黃鳥聲流轉綠楊枝感物各有懷婉孌惜芳時攬轡眺連岡迢遞滯前期相思邈以縣庶用證此辭

戊寅元日

萬里王正月千官漢侍臣履端空鼓角行在尙風塵烽火新通代鑿輿近向秦已聞催羯鼓夜半勅迎春

河東道中

蒲坂水仍抱首陽山故連重華不可見孤竹轉堪憐煖色薰

楊柳春聲換杜鵑河流日滾滾百丈禹門前

昭聖皇太后輓章二首

慈極空遺誥僊輿去不還千言臨內殿萬姓哭深山雉扇秋
新掩龍髯歲久攀併將江上淚霑灑泰陵間

先帝留弓劍千秋傷若何竟違西內養還葬北山阿玉殿涸
霜露立宮隱薜蘿兩朝侍臣在哭向白雲多

眞宗汾陰行宮有御製碑四金人

宋帝行宮汾水邊翠華想像杳風煙天書雲篆今何在玉檢
金泥竟不傳伐石自鐫西祀日渡河翻恨北征年金人十二
多零落雙立猶看輦道前

李牧祠下眺望作

泉源冰竇入春分鳥語花香遲客聞戍鼓寒沈龍塞月夕烽
晴照雪山雲年來近野多戎壘時過迴陽幾雁羣險絕頗憐
今昔地無令但說李將軍

張鏊一首

鏊字濟甫南昌人嘉靖丙戌進士選庶吉士改禮部
主事歷員外郎中出爲浙江提學副使歷遼東苑馬
卿廣東布政使南太常卿就改大理卿擢刑部侍郎
進南兵部尙書有遷鶯館集

竹山洞

洞門虛敞幾重關怪石玲瓏水竹間滿地白雲流不住仙家
歲月自消閒

陸邛一首

邛字秀卿嘉善人嘉靖丙戌進士授南刑部主事遷員外郎中改北再改南兵部出為常德知府改武昌再改岳州擢太僕少卿歷南鴻臚卿就改光祿卿以僉都御史巡撫河南有篋齋集十卷外集二卷

四庫總目徐階誌邛墓稱邛讀書恥為章句嘗曰人心與事物不相離舍事物而徒求諸心者俗學也故集中有傳習錄存疑不附和陸學又有詩傳存疑亦不盡墨守朱學持論可謂篤實詩文多近質朴

訪柯侍御九華山留贈

趨朝同聽午門鐘九陞森嚴虎豹雄何事歸來化城卧硯屏閒弄九芙蓉

張子立一首

子立字原禮黃人嘉靖丙戌進士除行人擢湖廣道御史累官僉都御史巡撫延綏謫戍固原

黃花堡

關塞雄三鎮風煙劇五戎胡塵驚代北漢月照雲中戰士黃沙磧將軍白玉驄防秋烽火近何日捷音同

屠應竣四首

應竣字文升平湖人太保勳子嘉靖丙戌進士選庶吉士改刑部主事再改禮部歷員外郎中仍改修撰

歷侍讀進春坊右諭德有蘭輝堂集四卷

四庫總目應竣為文善比事屬辭詩法汎濫諸家時有獨造然牽於華藻蘊蓄未深泰泉集漸山英穎天出文不待蒐羅綴緝而自充遠正誼發乎構思浩氣動乎操觚卓識烈於秋陽危言

皎乎金鏡

明詩選陳卧子曰屠公典麗流暢亦足名家
靜志居詩話論德取材六代具體初唐爛若春葩將
以秋實是眾作之有滋味者
田按漸山文長於摹古上規兩漢下效唐人格雖沿
古而意取切今非徒以字句為藻繪者詩亦有氣格

上之同

上之同乘六龍龍文五色雲九重參駕日月前飛虹逐虜蕭
關道祀帝甘泉宮別館迢迢與天通屬車絡繹渭橋東翻翻
豹尾翔煙空瑤池終燕歌秋風歸來萬歲樂無窮

夏日延綏捷至奉寄總制唐相公

北虜安危繫中原節鎮雄君王親授鉞相國坐臨戎瀚海軍
麾動狼山轉戰空遙聞六月頌不數太原功

送唐生

杖策欲誰親侯門不禮賓空彈馮氏鋏莫救范睢貧玉露凋
紅樹金風起白蘋蕭蕭南去雁飄泊自為鄰

朝陵

本朝宮寢居唐北百二河山枕上都隧道陰陰連大漠金輿
寂寂闕蓬壺天留碣石為華表水繞桑乾作鼎湖欲寫神功
鏘嶧頌窮崖絕壁倚天孤

王格 二首

格字汝化京山人嘉靖丙戌進士選庶吉士改永新
知縣遷刑部主事改戶部歷員外郎中出為河南僉
事坐事削籍授太僕少卿致仕有少泉集三十三卷
田按汝化盛有時名詩多率意不堪留賞

燕

高棟鬱嶙峋年年一度春堂前知幾主來掃畫梁塵

望太室

中嶽遙開洛水濱涼風吹夢土嶙峋二十四峯春寂寂碧雲何處訪眞君

陸粲四首

粲字子餘一字浚明長洲人嘉靖丙戌進士選庶吉

士改工科給事中坐劾張璫桂萼謫都鎮驛丞遷永

新知縣有子餘集八卷

四庫總目粲早入詞館負盛名洎官工科以劾張璫桂萼偃蹇終身亦緣是息意邱園研心經史學問具有根底又爲王整門人其授受亦有端緒擔夫謠有香山新樂府遺音未可以篇什無多遂謂曾子固不能

詩也

弁州史料貞山爲文精雅有法得班氏及韓歐遺意國雅陸給事浚明長於古風至近體云無夜不成寐有書空道歸郡古留銅狄堂深繡土花又無因得似宮前柳時有長條拂御衣有句如此亦李唐四傑之選

黃宗羲明文海貞山文秀美平順不起波瀾得之王文恪居多乃歐陽氏之支流

列朝詩集子餘詩不多獨出機杼不落窠臼田接世傳胡孝思爲蘇州太守試士賞拔王履吉爲

第一子餘少後及子餘衡文浙江孝思適爲參政公

燕日相對怙余檢子餘集致天水胡公書情致不

淺或世誤傳也子餘以劾張璫吾黔都鎮驛丞驛

舍廢跡居平越與郡人講學自是有擢科目者子

餘詩長於古體存詩不多咸自精美以世多賞其文

邊軍謠

邊軍苦邊軍苦自恨生身向行伍月支幾斗倉底粟一半泥沙不堪煮盡將易賣辦科差顆粒那曾入鍋釜官逋私債還

未足又見散銀來糴穀去年糴穀揭瓦償今年瓦盡兼折屋
官司積穀爲備荒豈知剝肉先成瘡近聞防守婺川賊盡遣
丁男行運糧老弱伶俜已不保何況對陣臨刀鎗宛宛嬌兒
未離母街頭抱賣供軍裝閭閻哭聲日振地天遠無路聞君
王君不見京師養軍三十萬有手何曾捻弓箭太倉有米百
不愁飽食且傍枸欄遊

送魏師召之蕪湖

魏子昨捧分司檄與我青瑣門相逢朱袍皂帽氣迥逸佩刀
左右雙盤龍燕山雪消河冰泮玉節辭天春未半江東花滿
姑孰溪君到春衣應未換謝公宅前芳草生李白墳頭江更
清日出青山看無鶴月明采石聽流鶯多君俊邁今無匹四

十爲郎頭正黑文貞遺笏世珍奇知古流風本仁直都門送
爾惜離羣日暮行歌潞水雲明年躍馬東城陌楊柳青青正
憶君

上饒道中

桃花參差柳葉多新雨灘頭生綠波一夜東風吹驛舫榜人
齊唱弋陽歌

長門怨

金屋承恩事已非玉顏憔悴度春暉無因得似宮前柳時有
長條拂御衣

江以達一首

以達字子順貴溪人嘉靖丙戌進士授刑部主事歷

郎中出爲福建僉事遷湖廣提學副使有午坡集四

卷

上清祝聖逢孫默齋使君感贈因期同陳午江枉顧山

憶別無今日生還有歲年那期千里合相見一潸然往事秋
雲外幽懷落葉前何時與同好方駕枉林泉

林雲同一首

雲同字汝雨莆田人嘉靖丙戌進士選庶吉士授編
修累官南工部尙書致仕起南刑部尙書未赴贈大

子少保諡端簡有讀書園集

遊玉澗和他石韻

出郭神應豁登臺氣益涼風回青入座澗曲碧流觴林鳥迎
風囀池荷映日香碧筒猶屢勸待月恣徜徉

翁萬達 三首

萬達字仁夫揭陽人嘉靖丙戌進士授戶部主事歷

員外郎中出爲梧州知府歷廣西按察副使遷浙江

參政改廣西歷四川按察使陝西布政使以右副都

御史巡撫陝西進兵部侍郎總督宣大山西保定軍

務歷左都御史進兵部尙書以事降兵部侍郎兼右

僉都御史經略紫荆關尋斥爲民起兵部尙書未赴

卒贈太子少保隆慶中追諡襄毅有思德堂集三卷

田按尙書以武功著不以詩名而橫槊之餘自饒豪
氣

鳳城水漲

四月潮城溪水漲老鴉洲畔橋欲平娟娟鷗鳥踏浪喜短短
竹枝搖水清得風船舸相對發入暮蛟龍時一鳴北來客子
念歸久棹月臨流雙眼明

枳兒嶺

枳兒嶺上煙火微枳兒嶺下行人稀長風捲樹葉飛落道是
將軍射虎歸

送胡思岩

沙日茫茫塞草黃塞風獵獵暮天長手拈羽箭故人贈射殺
陰山雙白狼

李元陽 三首

元陽字仁甫大理太和人嘉靖丙戌進士除江陰知

縣徵授御史出為荊州知府有中谿漫稿艷雪臺稿

田按仁甫為楊門六子之一詩品在弘山愈光之次

晚步戴氏園亭

小檻橫山色幽居隔世氛檐垂雙澗瀑窗占五峯雲竹影風
前亂花叢月下分石鐫堪煮茗遲客坐爐薰

京都九日

兩度重陽逢客裏蹉跎已覺賞心違此時孤館堪流淚何處
高臺可振衣黃菊向人徒自好青山待我不能歸茫茫塵海
空奔走欲傍沙鷗問息機

別金陵泛舟懷南臺諸子

秋月雁空度寒江舟自閒時時回首望何處是鍾山

崔廷槐 七首

廷槐字公桃平度州人嘉靖丙戌進士授戶部主事

歷郎中出爲四川僉事有樓溪先生集三十卷

田按樓溪詩清脗可誦

赤壁

嘉魚縣南石頭驛石上天書赤壁字龍涎蛟沫苔蘚封點波
猶帶風雲氣攀蘿直上青林顛千古封疆落眼前英雄戰壘
不可辨但見萋萋江草凝寒煙解衣沽酒楊花村老翁擎出
雙瓦盆揮杯且弄山間月弔古還招江上魂黃州逐客玉堂
仙水落山高載酒船片帆未挂臨臬岸兩賦空令百代傳

臨淄

山縣古臨淄城塵淨晚颺呼僮解寶劍邀客換金卮雲抱齊
王塚川回夏禹祠不堪風雨夜花落野棠枝

王喬洞

鳧舄朝元去巖扉對日開雲封春藥碓花暗講經臺挂壁猿
猶至衝煙鶴未回何緣捐玉佩從爾訪天台

樓溪十景

錄二

吾愛輓轡灣清瑩鑑毛髮中有避世人臨流弄明月

吾愛樓子石秋水涓涓溜循級下三疊哀此雲和奏

潼江

潼川江水抱村斜兩岸青山似若耶一葉小舟雙蕩漾月明

撐入刺桐花

諸將

遼東傅瀚雖云老
猿臂猶彎兩石弓
獨倚營門無箇事
閒將獵騎捕黃熊

田汝成 四首

汝成字叔禾錢塘人嘉靖丙戌進士授南刑部主事
歷員外遷禮部郎中出為廣東提學僉事降滁州知
州遷貴州僉事進廣西參議有叔禾集十二卷

四庫總目汝成歸田後盤桓湖山搜剔名勝殊以風流
自賞其詩隊杖修整娟娟秀出然使逢大敵則未足
相當
國雅田學憲叔禾學古才膽網羅舊聞多所著述詩
古體出入騷選頗沈鬱豪縱如探珠合浦夜光迫人
往往眩目

靜志居詩話叔禾詩品在范菁山江午坡間
田按叔禾宦遊所至撰炎檄紀聞歸田後撰西湖遊
覽志及志餘可謂好事詩格不甚高時有俊語

萬民望久寓宜興詩以招之

浪迹名山恣遠探
白雲何處可停驂
鶴迷煙冷張公洞
花落春深玉女潭
立酒未醅慚獨酌
丹經初試擬同參
爭如舊隱西湖曲
五柳琴琴杜草菴

胡十八

新翻胡十八急調出西涼
不入鷓絃細能隨鵝管長

憶張百戶一夔

不見西村張戶侯
惜花憐月近誰傳
南鄰酒伴應無恙
日日溪邊放小舟

廣州竹枝詞

窄袖青衫白蛤巾波羅廟裏賽新春
聖童巫媪村村會疊鼓鳴鑼拜海神

樊鵬一首

鵬字少南信陽州人嘉靖丙戌進士累官陝西按察

僉事有集

田按少南大復弟子五言差勝

大悲閣作 宋太祖常駐驛在真定

寶閣開金地雲梯上紫霄君王留勝概人代已三朝
晉水寒聲近常山秋氣遙如何憑檻處還似翠華飄

東林寺

遠公不可見此寺乃東林客路登臨地浮雲世代心門幽
山霧集逕曲野花深夕坐焚香榻惟聞鐘磬音

聞人銓一首

銓字邦正餘姚人嘉靖丙戌進士除寶應知縣擢山西道御史
歷湖廣按察副使有蘭芷集

楊棧嶺

楊棧接高天白雲山下看花落雨餘雨風吹寒食寒縱目黃
山外停驂紫漢間斜陽過廣惠始覺有人寰

范言一首

言字孔嘉秀水人嘉靖丙戌進士除蒲圻知縣改保定教授
歷國子監丞遷大理府同知有善陽集四音

存稿

湖上

誰開湖上閣，獨對晚來曛。
鶯語排花出，潮聲帶雨分。
遙看鄰牧散，閒與海鷗羣。
自笑江干老，悠然卧白雲。

岑萬一首

萬字體一順德人嘉靖丙戌進士
歷官河南布政使有蒲谷集

秋江玩月歌

今夕此何夕，弄月江上秋。
秋水清淺上，有黃蘆洲把酒問。
明月清光今幾何，如何今年景還比。
去年多波光，月色兩相射。
與君玩之發浩歌，斟美酒百千巡。
鷓鴣解換玉樓春，竹間

村犬吠，泠泠山風颯颯吹。
殘雲漁笛一聲愁，殺人

郭鳳儀一首

鳳儀字口口祥符人嘉靖丙戌進士
累官按察副使

送王後隅歸揚州用韻

維揚渺何許，引睇暮雲東。
四月桐花老，扁舟出楚中。
相思千里月，歸興一帆風。
我亦懷鄉者，因君寄桂叢。

王宣一首

宣字敷言臨海人嘉靖丙戌進士官御史

日暮抵萬年寺

台山高不極，日暮倦躋攀。
水向天邊落，人從雲際還。
捫蘿轉絕壑，坐石俯深灣。
檜竹禪房靜，逢僧意自閒。

祝文冕

一首

文冕字口口德興人嘉靖丙戌進士

檀嶽峯

檀嶽高如許煙霞自往來桃花馬頭落莫認是天台

陳仲錄

一首

仲錄字子載武陵人嘉靖丙戌進士除新城知縣累

官山東按察副使有集

德山寺和頂節推韻

招提十載湖前遊依舊青山枕碧流鉢裏龍眠雲自遶雨中

花落鳥空愁金仙勝界塵蹤絕玉帶高風過客留欲向山靈

分半隱題詩先上最高樓

谷繼宗

一首

繼宗字嗣興歷城人嘉靖丙戌進士官知縣

山左明詩鈔王季木齊音詩七子為詩本四家太常筆底盛煙霞華峯一柱誇難盡羣玉璘珣更滿車注云濟上之詩以邊庭實為鼻祖若劉函山李于鱗許殿卿谷少岱不可勝數濟南名士多從昔然矣

贖舊亭後有感

可憐一曲吟詩墅棄作三年賣酒家此日草堂歸舊主傷心

不見拒霜花

李學詩

一首

學詩字正夫平度州人嘉靖丙戌進士累官中允有

桃花洞集

聽菴

黯淡籬邊月，淒清竹裏風。草堂秋夜永，獨坐聽寒螿。

張鐸一首

鐸字西林，壺關人。嘉靖丙戌進士，選庶吉士，改三原知縣，遷戶部主事，改兵部，歷員外郎，中出為湖州知府，有西林集。

崇雲寺

萬壑中開小有天，人傳卓錫已千年。蒼煙一抹丹崖合，靈石雙泉樹杪懸。貝葉翻時龍護法，蒲團入定虎參禪。一區靜土真天設，社結青蓮共往還。

高遠一首

遠字近思，上元人。嘉靖戊子舉人，官汝州知州，有飲

虹稿

金陵瑣事羽伯陳公評青溪社中四子詩云：高汝州近思，雄壯奇拔，馬國學承道博雅，典則金文學子，坤清新秀朗，金孝廉子有則兼總諸長詞義，雙美夫金氏昆玉，尚有詩集，若高馬二公人且不知姓名也。况於詩乎。

弘濟寺

捫葛人從石壁行，入門坐久聽鐘聲。江豚吹浪出，還沒野鷺得魚棲。復驚孤嶺半，遮春樹密。亂帆斜挂夕陽明，眼前似此流光美，不用登臨感慨生。

于玘一首

玘字子珍，東阿人。嘉靖戊子舉人，官平涼同知，有于

氏詩畧

海嶽靈秀集冊川詩爽慨近工部

滄州

九月一日渤海郡涼風落葉何紛紛孤舟伏枕逢秋色長路
停樽對暮雲荒草亂迷龔遂廟清川曲抱獻王墳古今蹤迹
堪惆悵獨向滄波弔夕曛

孫宜 五首

宜字仲可華容人嘉靖戊子舉人有洞庭漁人集五

十卷

藝苑厄言國朝學杜者華容孫宜得杜肉
國雅孫漁人新聲奇調河嶽隱淪之質秀者句云嘯
裏驚山鬼談中有谷神角應江聲起雲兼海氣浮其
品當在李唐二孟之間
列朝詩集仲可為見時得侍何仲默長而頌慕其風
流上春官不第肆力詞賦以不朽自命自稱洞庭漁

人與漁人張含秦人左國璣吳人黃省曾皆以老舉
子有名於時仲可詩多至三千八百餘首王元美評
詩云華容孫宜得杜肉余觀其詩剽擬字句了無意
味求杜之片鱗牛瓜不可得而况其肉乎
靜志居詩話洞庭漁人詩滔滔莽莽下筆不休亦楚
產之傑出者

苦雨走筆簡王生

城東草堂白晝開洞庭主人騎馬來昨當驟雨暗江縣疾風
迅雷中夜迴堂前淤泥一尺深欲往問子偕醉吟蓑衣濕盡
屐齒折縱有美酒同誰斟黑雲漸破雨漸微青山映湖鷗出
飛花風宕煙畫漠漠竹日澹影晴暉暉我方卧病江城頭君
也磊落還舊傳即須度竹穿花去為買高歌伴醉遊

閒居

苦憶南湖子平生野興高水傳滄海興山有白雲謠酒伴時

相過綸竿日自操深居憐寂寞飛夢故蕭蕭

亭上對雨

對雨高亭暮焚香獨院秋水陰依檻合雲氣隔城浮蘿竹占
寒意漁樵送野謳葛巾欹側久隨地卽林邱

江漲一首

五月六月雨不歇章華城邊江水來排山觸石須臾事未道
瞿塘灩澦堆

洞庭南望接江鄉九派波流日渺茫更遣岷嶓連楚鄂卽疑
巴蜀是瀟湘

顧聞一首

聞字行之吳人嘉靖戊子舉人

岳岱山今雨瑤華九嶷山人才華瑋麗鋪敘豐長究其所歸靡不有自至於染翰人稱並美

清明日過楊村


楊柳蔽楊村桃花古渡昏清明猶作客白日正銷魂天地催
時序闕河杖酒尊何爲千里夢一夜落吳門

鄧遷一首

遷字世喬閩人嘉靖戊子舉人官嘉興通判有別駕集

夜白紵歌

明月滿庭涼夜時桂宮歌舞爲君施纖腰嫋嫋聲遲遲金蓮
照耀光陸離瓠犀螭首青蛾眉銅壺玉漏夜何其酌酒勸君
君莫疑人生樂在心相知



歸田日賦詩林

明詩紀事

貴陽陳田輯

戊籤

羅洪先 十一首

洪先字達夫吉水人嘉靖己丑第一人及第授修撰
進左春坊贊善疏請朝東宮忤旨罷為民隆慶初贈
光祿少卿諡文恭有念菴集二十二卷

司勳集羅子習於道論卒為詩病
胡直衡廬精舍藏藁念菴先生學凡三變而文亦因
之少學文傲李空同棄之曰是未見端委者既入宮
寮又與唐荆川趙浚谷相講磨大放於文久之語直
曰吾無意為之矣移答友人取譬於水曰古之人有
能之者必其中有自得實見斯道之流行無所不在
雖欲不為波濤湍瀾之類不可得也

列朝詩集達夫詩文託寄可觀時人謂其早經廢棄
久處民間往往深於致情易於與感殆亦近於言志
者也
靜志居詩話達夫遠師擊壤近仿白沙定山然爽氣
尚存未墮塵霧
田按達夫五言詩具有體格擅清遠之致惟語參講
學時入擊壤一派

重至仙居寺

山雨鳴鐘餘阡陌斷行迹高刹隱回岡流潦汎春澤新構門
巷更重臨歲月積訪禪草翳徑緜經塵在席僧齋餘舊突梵
相懸頽壁乍見驚夢寤沈思悔形役逝者今若何躊躇增太
息

種蔬

謀生無遠術樹藝有良時嘉蔬來何遙故人手致之荷鋤出

荆扉荒榛力所披景翳苗易瘠土薄根不滋惡壤與敗株能
令蕃者衰兢茲分陰功日暮未辭疲所欣寡逢迎燃薪繼頽
曦黯黯開谷陰柔芳亦離離抱甕理晨夕療饑方在茲

種菊

結宇灌木下庭除幽自閑豈無豐草容柔綠爭春妍常恐秋
風至清霜凋故顏萬族忻時榮保終良獨難惟此黃金花可
以結餘歡

懷友

獻策動京華還山種桂花從知卧金馬不及練丹砂五月盧
敖杖三秋博望槎伊人竟何在歲歲望蒹葭

寄楊實卿

燕歌別易水蜀道隔湘雲江柳年年綠攀條獨憶君
嗚猿渺何在來雁不堪聞莫就成都卜玄經自有文

贈高洲劉述文

高洲似赤城繞屋種黃精溪水桃花色煙林布穀聲
記年從漢魏混世狎公卿莫學劉郎隱尋山更得名

將入衡山貽李文興

分袂懷蘭畹飛帆倚桂舟白雲何處所綠樹是南洲
古嶽連雲起清湘抱月流鳳笙如可望伫爾太清遊

劉生

劉生多意氣執別歲華深一葦不肯渡四愁空自吟
春江斜檻外暮雨對峯陰古調人多棄冷冷鳴素琴

同江

同江二月如潑醅春水自上鵝洲來一雙白鳥掠波去
無數好山當面開漁樵苦說生事薄笳鼓時聞驛使催
何日昇平棄檣散扁舟應傍釣魚臺

駕幸太學陪祀孔廟

萬乘出銅龍千官扈蹕同金根下星漢翠葆麗春空
幄啟張皇邸庭趨奠澤宮詩因八佾變是年去王號稱先師始用六佾祀豈一牢豐

法駕橋門轉周廬陛楯通垂衣臨六館委佩引羣工
見聖青衿合橫經黼座東嘉賓來聖裔憲老憶申公竊慕臣談業躬
逢帝典隆辟雖遲獻頌紀事序王風

南旺湖

百年風景茲奇絕到處江湖卻欠詩
驢背不歸秋易老黃花也解笑人癡

程文德 三首

文德字舜敷永康人嘉靖己丑第二人及第授編修
以事不詔獄謫信宜典史量移安福知縣遷兵部員
外歷郎中擢廣東提學副使未赴改祭酒拜禮部侍
郎改吏部再改南工部以言事除名萬歷初追贈禮
部尚書諡文恭有遺稿三十二卷

芳桂

因君芳桂隴懷予雙桂堂秋風賦招隱清夢到江鄉

題畫

雲深地僻草堂開門巷經旬長綠苔何處故人驚
午夢溪橋拄杖帶琴來

宿天遊菴

天遊忽上憑虛閣洞宿仍分絕頂雲
夜靜千峯涼月白吹笙疑是武夷君

胡松 四首

松字汝茂滁州人嘉靖己丑進士除東平知州遷南
禮部主事歷郎中出爲湖廣參議進山西提學副使
就遷參政以事斥爲民起陝西參政歷浙江按察使
進布政使以右副都御史巡撫江西進兵部侍郎改
吏部遷南兵部尚書徵拜吏部尚書贈太子少保諡

恭肅有集八卷

同戚南玄渡江游宿長干諸山寺

桂館秋逾淨荆扉晝不開
雨花飄法界瀾茗坐清齋
閣外江光動檐前樹影來
禪心與鷗鳥終日共徘徊

桃川次韻

神仙丹洞古樓觀白雲深
野鶴盤空下江猿擁樹吟
地偏稀外事坐久愜幽心
芟服終當製行歌復弄琴

山居雜興

隱几花千樹看山石四鄰
翛然無一事疑是葛天民

旋途雜詠

花開煙嶼香風轉霞映江波
錦浪生仙客船頭吹玉笛
不知

何處是瑤京

蔡雲程一首

雲程字亨之臨海人嘉靖己丑進士授兵部主事累
官刑部尚書贈太子少保有鶴田草堂集十卷

再遊雞鳴寺

城隱空中閣林開象外天
松門芳草接石磴碧蘿懸
花雨滋嵐翠香雲覆澗泉
逢僧竹房裡處處裊茶煙

楊博一首

博字惟約蒲州人嘉靖己丑進士除塾屋知縣改長
安徵授兵部主事歷員外郎中出為山東提學副使
超拜右僉都御史巡撫甘肅進右副都御史召拜兵

部侍郎經略薊州保定遷總督薊遼保定軍務歷右
都御史進兵部尚書加太子少保改總督宣大山西
軍務加太子太保改薊遼總督召還加少保改吏部
尚書進少傅兼太子太傅少師兼太子太師贈太傅
諡襄毅有詩文集十二卷

田按襄毅敷歷九邊屹為重鎮身繫安危者三十年
其送程鑾行邊詩云何似籌邊相全收出將功九霄
雙赤鳥萬里一形
弓襟抱可想見也

送雷

繡斧西巡日河關碧樹齊九重勤一使萬里慰羣黎回紇識
驄馬番戎謝鼓鞞還知登望處威振玉門西

鄭大同一首

大同字皆吾莆田人嘉靖己丑進士授行人遷吏科
給事中歷都給事中進南右通政就遷太僕卿歷太
常大理卿擢刑部侍郎贈尚書有居侯堂集

遊金山

九折趨溟渤金山遠勢踰孤根出竈窟一柱控龍門石露秋
逾瘦江平浪欲吞蓬萊吾已得應不數崑崙

鄭綱一首

綱字子尚大同弟嘉靖己丑進士累官兵部侍郎總
督兩廣

東南嶠外詩話鄭葵山與兄于野同成嘉靖己丑進
士同登卿貳有黃田驛句云春山入戶飛嵐溼古樹
當門白晝昏
可入畫稿

秋懷

霜前疏柳蕭蕭落水上寒雲淅淅浮莫怪登樓賦懷土秋風
偏感仲宣愁

林恕 四首

恕字道近福州長樂人嘉靖己丑進士除知縣

遷都察院經歷出為雷州知府累遷雲南按察使有

西橋集

靜志居詩話西橋近詩依
然林子羽王安中流派

滇南春暮寫懷

臺署春已歸風雨連朝夕庭幽花影沈砌冷苔痕溼愁人思
轉深啼鳥聲偏寂悵望倚危欄簾捲湖山碧

過偏橋驛

牂牁戍壁鎖重環疊嶂凌空擁翠鬟萬里風塵連越雋九溪
煙火接荆蠻星橋日落笳聲急雲邏春深草色斑聞道龍標
圍未解何人橫劍倚天山

夜泊揚州

廣陵城外水雲幽萬里歸程一葉舟山勢北來衝海斷潮聲
東去入河流瓊花觀裏春光去楊柳塘邊野色秋休聽秦淮
商女曲阿儂亡國是迷樓

遊崇信寺

巢雲方丈鎖潺湲流水柴門永日關萬壑煙光秋雨後一庭
草色夕陽間香殘石鼎僧初定簾捲巖扉鶴未還暫息雙林

了真諦倚闌邀月獨看山

楊祐一首

祐字汝承錢塘人嘉靖己丑進士選庶吉士改刑部員外出為曹州知府進江西僉事改湖廣有丹泉集

萬應錢塘志汝承詩清俊能為顏鮑家言靜志居詩話汝承諸體瀟灑拔俗

郡齋自遣

丹泉野人木石姿服官三十髮成絲逢人澀齟苦不達閱世喧卑翻自疑礎田猶足飯黃犢空谷能忘歌紫芝攬衣拔劍忽自笑浮雲四顧茫何之

吳子孝十首

子孝字純叔長洲人嘉靖己丑進士選庶吉士改台

州推官遷廣平通判徵授南吏部主事改禮部遷光

祿丞出為湖廣參議有玉涵堂稿十卷

司勳集純叔玉涵堂詩綴詞婉以麗御氣雄以健抒思優以儻援事典以則振響和以平才情信美興寄尤深如汝官漳水北今得定州書工於發端塞空一雁去離思繞山河逸於終奏又雲來山閣風雨過石池秋大隱非人外微言乃道初月映蒼松逕雲生白石臺玉虛香火清齋地紫禁煙花悵望時獨有馮唐頭已白青袍郎署自年年並若神構足稱警策靜志居詩話純叔藉甚詩名特格未高聳田按純叔詩語清新亦嘉靖中詞人之雋

韓陵行送人之上黨

春生具區水雲暗洮湖樹曉潮催兩漿君向韓陵去鄴下山川天下雄文章況有黃初風鬪雞晨出邙城北射獵霄歸漳水東君結豪英持一劍走馬韓陵如躡電賦詩應上三臺宮

弔古須傷九華殿近聞惡歲土苗稀
黃河不東民苦飢杞國懷憂竟何益
念君此去何時歸

送沈潤卿還南陽

江南暑雨晝不開海霧上暮姑蘇
臺臺前別有故人去驚濤疊浪爭
喧豗君儻南陽雪初折吳門柳歲
月來幾何長帆仍北首鄧尉山頭
多桂枝虎邱石上攬瓊芝故園十
載松楸淚楚國千年桃李辭粲爛
華裾曳來久賜璧願金陳醴酒枕
內曾書鴻寶方座中誰在相如右
校生老去戀梁王清水豐雲道路
長千里月明堪悵望洞庭霜橋待
誰嘗

金山

明月妙高臺盤渦月照開琳宮龍
久駐珠樹鶴曾來雲霧空

中靡帆檣檻外迴無言卷石小江
左擬蓬萊

送僧之杭

餅鉢今何適飄然向武林江風吹
衲影山月照禪心巢鶴形容古祛
蛇道術深欲知無上義南北兩高
岑

橘溪僧院

蟬聲不出寺鐘斷祇聞香流水迷
松徑間雲滿石牀無言忘寂寞宴
坐得清涼欲謝人間事冥心叩藥
王

祇命拜陵出得勝門作

乍辭蓬閣下彤雲風煖郊原草正
薰十里垂楊春澹岩七陵佳氣曉
氤氳馬依輦路橋山側鶯和錫簫
曲水濱回首故園誰麥飯不堪愁
絕倚斜曛

送人使楚

長安七月雨不休愛子持節凌清秋水衡實少南方賦傳吏
須迎使者舟廬岳雲霞迴席見洞庭波浪接天浮誰能詞筆
誇三楚遙憶仙人黃鶴樓

題天池

竹疏漏雲色泉細落嵐霏日暮不歸去山風吹客衣

慈仁寺

寺前老柏不知歲閣上風鈴欲語人一榻秋窻槐影底從教
門外漲紅塵

贈朱子羽之鉛山令

下馬愁腸劇轆轤王喬今日去雙鳧木蓮花發江南暮君過

靈山相念無

楊本仁八首

本仁字次山杞人嘉靖己丑進士授工部主事改刑
部歷郎中出爲江西按察副使歷湖廣參政遷廣西
按察使有少室山人集二十五卷

田按少室山人詩不盡入格時有佳篇如披榛採蘭
香韻獨絕

上元督府宴集

萬里逢元夕軍門春獨私江山俱是客燈火自深卮世局應
難定鄉心不易持蒼梧今夜月流影鑒鬢眉

雨懷

愁絕經旬雨冷然池館清把杯春草色燒燭暮江聲雲裏天

池寺湖邊湓浦城悠悠坐相繫清嘯不勝情

柏林寺灣

孤棧凌空雪後行
半山古寺晚鐘清
人從碧落窺丹壑
僧在白雲弄紫笙
翠柏不凋前代色
衰猿偏作異鄉聲
迴風落日江流急
匹馬千崖四望情

巴人竹枝歌二首

院裏迎春郎手栽
花時郎繞百千迴
從郎去後春無主
縱有風吹花不開

江上帆檣亂不齊
煙波望望妾心迷
何如化作江中水
郎若東時儂不西

上元命候吏折梅花

鄞江小吏誰家村
折得梅花枝半存
卻怪先生緣底事
上元時節不開尊

四一亭對雨

逃暑何緣聊水坐
花眼竹困晚俱醒
隔雲遙揖匡南老
爲展插天九疊屏

爲雪解嘲

春事江南異江北
年年雪裏放桃花
玉妃解識東皇意
細剪六英點絳霞

沈愷四首

愷字舜臣松江華亭人嘉靖己丑進士授刑部主事
歷員外郎申出爲甯波知府量移臨江歷湖廣按察

副使進參政乞歸隆慶初起太僕卿不赴有環溪集

二十六卷

田按環溪論詩皈依何李五言亦爽脫有致

暮冬嵩山寺

冰霜驚歲晚寥落詎堪論
宦興懶於鶴冥修未到僧
風塵歲月城郭死江村忽憶環溪上寒梅幾處存

歸思雜言

幾年羈宦轍一疏乞巖居
聖容疏懶冥心只晏如閒
調吳苑鶴不食武昌魚長日應無事蕭然讀素書
作吏二千石歸來無酒錢
苦心成白首岸幘向青天
止飲憐彭澤清遊憶朝川塵心銷落盡吾意欲逃禪

憶任城

春風一渡魯陽水夜月三更太白樓
安得四明狂客在金龜
換酒散春愁

崔涯一首

涯榜姓字若濟甯國太平人嘉靖己丑進士官監察御史以劾任銜罷官有筆山集十卷

和縣尹韻

移樽就溪石坐上東山月老眼醉模糊
天空水雲白

陳子文一首

子文字在中閩人嘉靖己丑進士除麻城知縣徵授戶部主事歷員外郎中出為長沙知府改池州累遷

湖廣按察副使有于山堂稿

送李主簿

相逢十年隔相送復天涯
來折官河柳行看岳縣花
千村遠海嶼萬井帶桑麻
異域今多事殷勤問左車

陳節之一首

節之字尹和閩人嘉靖己丑進士選庶吉士授編修
遷春坊中允

早朝

太平天子御飛龍待漏趨蹕拜九重
花落玉階仙露溼柳垂金鎖御煙濃
蟻切漸集千官珮曙色微催太液鐘
幸際明時慙補報願陳三祝効華封

胡經一首

經字廬陵人嘉靖己丑進士累官太常少卿

遊鐵佛寺

夙愛南郊禪寺靜孤吟落日戶長扃
春來好鳥答人語老去枯僧如鶴形
雨漲溪光連霧白雲開山色過江青
紛紛桃杏爭開落春氣曠人尙未醒

馮彬一首

彬字用光海康人嘉靖己丑進士官松江知府

採蓮曲

越江採蓮女綠袂紅裙照江水
桂楫蘭橈破曉煙歌聲宛轉
荷花裏儂家住在橫塘隈
日出採蓮日暮歸只恐霜落荷衣

敗看見鴛鴦對對飛

趙鯤一首

鯤字宇南壽張人嘉靖己丑進士累官貴州按察使

有九嶺集

龍王關送家人歸

湖水北來曉色昏湖邊春草怨王孫微微樹影遮山閣脈脈泉流漱竹根羸馬衝泥尋浦路孤舟拖雨過江村臨淮欲灑思鄉淚一夜隨潮過魯門

周顯宗一首

顯宗字子孝濮州人嘉靖己丑進士除秀水知縣歷官漢中知府有桃村山人自適稿

真州工部分司

隱隱高城月冥冥晚市煙歸來人競渡棹入蓼花天

蔡輿一首

輿字天章甯晉人嘉靖己丑進士除行人擢浙江道御史坐劾汪鏊廷杖為民尋以原官起用再謫山東按察知事隆慶初復職致仕有浚濱集十卷

送李樂菴赴池州司訓

依依楊柳暫停驂別酒何辭盡日酣此後相思成遠夢空隨明月到江南

張選一首

選字舜舉無錫人嘉靖己丑進士除蕭山知縣擢戶

科給事中以諫帝不親祀太廟受杖削籍隆慶初復
官進通政司參議有靜思遺集八卷

僧房

幽枝一聲鳥春滿萬家邨落葉蒼苔厚山僧只閉門

王表一首

表字邦正無錫人嘉靖己丑進士選庶吉士改戶部
主事再改南禮部歷員外郎中有代奕稿消夏編

題雲山圖

長空湛秋碧境與心俱閒我屋東山下白雲時往還

程烈一首

烈字惟光歙人嘉靖己丑進士官工部主事有水部

集

越中送楊次山

楊子洛陽才東風征騎催鄉心杜曲里官舍濟城隈客路鶯
千樹離亭酒一杯相思更相望擬上越王臺

史元中一首

元中號鹿泉鄆人嘉靖辛卯舉人除靖江教諭遷魚

臺知縣有青蓮集三十卷

農舍

布穀聲新春已分一犁好雨綠楊村年來底事催租吏未到
秋成夜打門

林垠二首

林垠字天宇閩人嘉靖辛卯舉人除桂陽知州遷撫州府同知入爲戶部員外郎有世牧堂稿

古戍烽煙息孤城對水開山從三晉出川向五原回遠樹依秦堞殘雲沒漢臺昔人遺恨在臨眺有餘哀

沙河行宮

宮殿連雲起城樓入漢低寒鴉如望幸朝夕自悲啼

唐鉞一首

鉞字君錫蘭溪人嘉靖辛卯舉人除溧陽知縣遷揚州同知改楚府長史

九日山亭

淮南秋老菊初叢佳日登高上客同雲岫盡含三楚色石林遙撼九江風池陽虎渡飛鴻外姑孰龍山落照中烏帽黃花兩羞澀愁邊短鬢已如蓬

黃中一首

中初名忠字文卿遂昌人嘉靖辛卯舉人除鉛山知縣行取授貴州道御史出爲山東按察副使有南窻紀竊集吹劍集田按副使詩意取輕脫間傷粗率

過朱陽仲墓

江關詞賦舊凌雲何事深山早築墳天上豈真無李賀人今猶自說劉蕡西風歸鶴空留恨落日啼猿不可聞三十年前

交誼在獨來披草薦溪蘋

強仕 三首

仕字甫登無錫人嘉靖辛卯舉人授江西廣昌知縣

遷德州知州有考槃齋歌綺塋集

盛明百家詩甫登夙階詩學嘗結會碧山吟社

陸龜蒙

澤國多隱淪天隨更孤峭甫里三畝居山水足幽討揮翰水

蘭堂太守驚絕倒拜賜故人衙永寄羲皇傲

秋晚山行小酌吟社

歸休無復事日與野情宜為愛秋原淨言尋山館期散行塵

外屐疏響竹間棋一遣沈冥理詩成懶重題

憶河豚

春城燈事動河豚首登俎身遠闔閭城夢繞西施乳

劉成穆 三首

成穆字玄倩崇慶州人嘉靖辛卯舉人有劉玄倩集

玉笥詩談玄倩生七歲能詩文十歲博識十五究經史百家談玄理談兵談世務珠貫川絡以春秋舉鄉試第三試春官不第發憤卒玄倩於詩文初不經意即席揮穎有甚佳者田按元倩才藻是李長吉一輩人惜不永年遺集今亦不傳故所錄止此

過漢武陵

歲暮霜殘過漢都武皇陵墓舊荒蕪不將玉匣藏天馬猶使

金燈照野狐賦客詞園清露盡仙翁丹竈白雲孤千年惟有

秋風曲渭水長流啼野鳥

玉筍詩談元倩過漢武陵詩升菴楊先生甚愛之

過千佛巖和察罕廉訪韻

丹壁蒼巖青鐵楹巖頭古溜苔蘇生千年刻畫魚龍擁白日
陰冥麋鹿行金草細搖蘿磴冷玉魚橫過石梁清臨流拊樹
堪心折野寺黃碑月二更

溫泉宮

碧洞霜清卧火龍翠華宮冷玉芙蓉遊人綠酒流春殿妃子
霓裳化曉風石閣獨逢明月醉瑤壇虛有晚霞封羽衣不見
梨園曲愁聽秦箏雜野蛩

許炯 八首

炯字彥韜新會人嘉靖辛卯舉人有吾野漫筆十三

卷

田按彥韜自謂少時不慧從羣兒騎竹馬黏蜻蜓鳥
雀為戲未幾病疴忽劇夢一父老出袖中書授之俄
墜而覺自是遂能把筆作詩頗近於怪吾野集中詩
率意一往真漫筆也披沙揀金時有合作亦自警拔

厓山大忠祠

古祠牢落對行宮朝市荒涼夕照中玉璽久歸滄海去銅駝
空見碧苔封已無抔土藏遺劍猶有餘民泣墮弓一曲雍門
歌不盡滿山松柏起悲風

螺川望文丞相墳

六歌聲斷市朝空紫蓋黃旂散朔風厓海有心同捧日燕臺
無路可從龍蒼梧處處愁雲黑杜宇年年怨血紅江上孤墳
勞望眼古碑芳草夕陽中

春日燕集同何樂樵作

佳客芳時不易逢
江南三月雨濛濛
酒當半醉半醒處
春在輕寒輕暖中
柳絮亂飄歌扇白
海棠如妬舞衣紅
晚來更按揚州調
聲繞吳姬翠袖風

舟中書所見

黃葉隱溪橋
歸雲擁高樹
爲問蕩舟人
蒼煙是何處

雲巢

幽人卧邱壑
相伴惟孤鶴
夜半山風來
時聞松子落

三月晦日

東風無力近黃昏
花事蕭條半委塵
開到海棠還細雨
飛來江燕已殘春

贈彈箏篴者

飛花無定水東流
繡幙春寒未上鉤
十四絃中新舊恨
一時彈作兩眉愁

秋江晚眺

萬里滄江帶白沙
漁舟風起釣絲斜
水邊秋色無人管
半屬蘆花半蓼花

黃省曾

四首

省曾字勉之吳人嘉靖辛卯舉人有五岳山人集三

十八卷

司勳集勉之苞蓄既富探汲不竭譬玄黃雜組而緝
彩炫目金石疊奏而英韶盈耳思劇沈幽語罕仍襲
凡象外難摹之景必鑄以新範雖目前塵瑣之態亦
緣以華辭

詩談勉之詩宗六朝如空江月明獨鶴夜警
藝苑厄言黃勉之如假山池雖爾華整大費人力
今雨瑤華五嶽情鎔李杜辭體梁陳遊覽之餘操觚
靡倦翦剔綺繡咀嚼瓊瑛每篇輟筆粲然驚目
國琛集季父天藻獨富學海滋深其詩攬景輒取摹
事必得時有神詣使人意消
列朝詩集勉之六齡好細素古文解通爾雅弱冠與
其兄魯曾散金購書賈精藝苑累舉不第交游益廣
王新魯講道於越參預講堂作會稽問道錄湛元明
振鐸成均則又學於元明名王湛兩家之學李獻吉
以詩雄於河雒則又勉之北面稱弟子再拜奉書而受學
焉獻吉就醫京口勉之鼓柝往候拜受其全集以歸
勉之文錄六朝好譚經濟有五岳山人集別撰西洋
朝貢典與地經老子玉畧諸書皆未行於世
田按勉之與虞書顯為言志道天動神解本於情
流弗由人造故虞書顯為言志道天動神解本於情
構唱直寫厥衷如春蕙秋蓉生色堪把意態各暢無
事雕模末世風類於燕鷗鶴遞相述師如圖繪萬錦
飾畫雖妍割也勉之實雖富根葉愈衰于葩萬葉
不如一榮之實也勉之所作正坐斯蔽所謂歎他人
之未工忘自己之已拙至其文序事頗復彬彬亦學
人之雅製也

麗娟曲

佳人年十四吹氣勝蘭香一曲庭花落餘音繞杏梁龍綃纏
紫袂錦帳掩明粧若非琥珀珮焉得動君王

黃家集夜思

窈窕大河陰宵舟轉曲溇星驂如客影波箭學歸心夢積俱
綠想愁來若解尋鄉園明月滿應待緯瑤琴


遊清涼山

舊刹歡新陟涼臺得煖攀殿懸秋靄樹江吐夕陽山法食供
遊饌林杯悅旅顏無勞支遁馬碧草步人還

虎邱詠

芙蓉近倚闔閭城眺閣觴樓逐勢成珠寺翻為歌舞地青山

盡是綺羅情巖花吐學紅粧麗谷鳥嘯兼鳳管聲十里垂楊
芳草岸四時常映彩舟行



明詩紀事

貴陽陳田輯

戊籤

孔天胤

天胤字汝錫汾州人嘉靖壬辰第二人及第授陝西
提學僉事歷浙江布政使有文谷集四十四卷

國雅孔方伯詩方之玉琢鼎彝材良器重款識工緻
特乏弘綽耳
靜志居詩話管涔山人如新調鸚鵡雖復多言舌音
終是木強
田按文谷刻意摹古五律亦自清拔

夏夜永嘉館

下馬送春色端居延夏陰流光坐自歎日暮不成吟客路連

滄海歸心滿舊林宵憂何所似波湧大江深

石梁

神嶺劃如闢互空橫一梁虹衢玉京路煙道羽人鄉迸水藏
金澗懸蘿暗紫房尚遲飛錫渡臨眺仵斜陽

秋思

白露沾野草商風吹前林容華忽以改寒涼時見侵四運有
承謝平生多苦辛豈不念時命積鬱終難任

歲暮深澤縣作

朔吹動寒館明暉生薄暈天空城柝散夜久客燈微處世能
誰是孤心乃獨非長思澤畔侶捐珮宜言歸

尹耕

六首

耕字子莘蔚州衛人嘉靖壬辰進士以知州罷斥徵

授兵部員外歷郎中出為河間知府擢河南按察僉

事坐劾成遠左有朔野集

列朝詩集子莘為人豪宕不羈性嗜酒喜談兵嘗為
州守廢免家居生長邊陲通知疆事痛恨武備廢弛
邊臣玩愒作塞語十一篇申明邊防虜勢之要害以
告當世作為歌詩沈雄歷落秋興上谷諸篇有河朔
俠烈之風分宜當國見而才之自知州起廢數月中
遷兵部員外郎中出知河間府河間畿輔重地虜數
入犯募壯士製戎器旌旗壘為之一新吏部希分
宜指稱其知兵破格改用擢河南按察司兵備僉事
仍予四品服俸令管領兵朝論譁然給事中張萬
紀抗疏劾奏上大怒械繫下獄雜治遣戍遼左自是
遂終身屏棄不復用矣國家急虜附韓思將帥之臣
當取文武大畧不應以文瑣節繩約摭撫分宜得
君當國能知子莘而不能違物議以收其用議論多
而節目繁何以羅出羣之材備羯夷之患耶

鵝鴿峪

鴉鷓嶺鴉鷓飛書生畫地談兵機一身恥潰千重圍千重圍
戰不止力漸竭兮鼓聲死胡兒馬上羨大刀南向挪揄齊嚙
指

戰城南

戰城南鼓聲沸胡陣如蛇前最銳三衝五合令轉嚴仰面看
天斜日墜胡去不苦追胡來不發矢大開陣角卧中軍凱歌
如雷四壁起

西城道中短歌

柳條當風戰猶力桃李無言混荆棘桑乾東帶斷冰流昨日
荒城作寒食君不見戰士經年挂鐵衣一身重犯數重圍紇
干山下營初散牟那峯前檄更飛年年烽火爲生計誰道沙

場春事稀

項羽墓

四方爭逐鹿三戶可亡秦何事新安卒同成馬足塵捐金行
反間撞斗失謀臣今日留坏土應慙負劍人

蔚州歌

南山陡絕石門峪西嶺斜通亂石灘敢勇近聞堪一戰莫教
容易近長安
井陘荒城日易曛阜平山下剩黃雲羯奴飲馬桑乾水愁殺
關南義勇軍

許應元 十一首

應元字子春錢塘人嘉靖壬辰進士除泰安知州改

泰州徵授刑部員外歷郎中出爲夔州知府遷四川

按察副使改廣西進布政使有崎堂摘稿十六卷

田按嘉靖初薛君采陳約之輩倡初唐之體一時七古頗少勁健之篇崎堂楊參軍歌聲調頗壯惜集中此例不可多得耳五律亦流動自然詩綜僅錄二篇不足盡所長也

讀殷近文集

殷侯本岸瑋氣與煙霞親一朝被組綬漢落隨風塵爲吏山水間給事金馬門榮遺志乃得道屈命茲屯瓌詞發靈性逸響振青雲變彼楚執珪咄咄將誰言

題畫

楚澤彌煙雨皋陸湛滢澄春風被修畹蘭草擢丹榮曹署雖局束書史有餘清披圖攬英秀浩蕩江洲情但恐菘菹滿涕

下還縱橫

楊參軍歌

楊參軍年向七十氣薄雲月請太倉兩斛粟常持一篇冰雪文前年虜入右北平上馬便繫纒胡纓歷詆燕壘一百二恨無尺筆答懦兵今年儻居水月寺閉門著書非所志滿壁滄洲虎頭筆三足故鼎蝌蚪字昭王臺前日欲斜相逢市南酒人家小僮鼓箏不入耳春風滿庭吹落花爾來幾時不相見玉河水膠道飛霰履如東郭有人嗤賦似長卿無客薦烈士懷奇祇自奇肯游鄴下屠沽兒但令風月且入手安問公侯能俛眉君不見荆山峩峩淮水急風雲瀕洞不可測虎變龍飛二百年猶貯英靈產詞客木門倉琅詎許攀聊復對酒丹

戊鐘卷十八
四
蒼顏豫章神物身在地光芒夜夜斗牛間

獨愁

玄雲荒野盡白雪古城浮溟海聞三嶠風煙攬十洲誅求餘
壁立祿食自身謀禹貢茫茫蹟憑高送獨愁

同蔡行人子木登高里山

沓騎青林盡登臺翠甸新雲山存吏隱詞藻待王人花日移
亭午蘭風泛早春遲歸非戀賞與爾對清真

題姚大參虛谷卷

傳君棲谷口一室坐生雲地迴栽花好天空落葉閉門漆
園吏開谷冰雪文應自聲聞遠還隨鳴鶴羣

鶴歸亭

丹壑訪茅店遺蹤闕白雲竹陰流冉冉溪水去云云無復鶴
歸日空傳鴻寶文獨令耽寂意深覺未離羣

送翁夢山憲使觀察河南

言辭蜀道險憑軾向中州共惜春前別還登江上樓曉雲千
騎擁芳樹一樽留去後知相憶封題報灑頭

送楊主簿之益陽

昔忝名山守同攀嶽頂雲榻來二十載京國再逢君黃綬仍
趨府青袍動出羣湘蘭與沅芷相憶採芳芬

寄徐承芳

伍公祠下吳峯曲竹裏新開孺子亭花徑祇通雙短屐茹齋
唯對一遺經此時見月殊方色夢裏羣山故國青蘆葉雁聲

推枕坐江南江北水冥冥

送黎松坡閣帥赴尚書幕府兼柬徐見山隱居

詔書新下獎元勳幕府仍看請護軍組練朝疑吳地雪油幢
畫引粵溪雲經冬碧樹上留客遶舍青山助憶君寄語南州

徐孺子待予歸伴老松筠

蔡汝楠 十首

汝楠字子木德清人嘉靖壬辰進士除行人遷刑部

員外改南刑部出為歸德知府改衡州歷四川副使

江西參政山東按察使江西布政使以右副都御史

巡撫河南召拜兵部侍郎改南工部有自知堂集二

十四卷

四庫

庫總目明史稱汝楠初喜文章從王慎中唐順之高

叔嗣顧璘皇甫孝兄弟遊中年後好講學與鄒守益

羅洪先相善詩格遂頽唐頗有壽陵餘子失其故步

之譏然汝楠才地本不足雁行王唐諸人亦不盡係

於講學之後荒廢吟詠也初釋褐競為聲詩然鑿刻藻

茅坤白華樓續稿子木初釋褐競為聲詩然鑿刻藻

麗過南省則洗去鉛華合響郎劉諸大家矣

藝苑卮言蔡子木詩如嬌女織流黃不知絲理強自

斐然蔡司空子木聲調淵雅情興高朗其集為用修

國雅者為藝林珍賞晚歲率易應酬似出二手五言

所選江看雁盡五嶺入雲多泉落雲中確溪同樹杪

云三鐘搖落葉細雨帶秋蟲七言云無復山門訪支
船疏留徑草待王孫此例酷似劉長卿
遁獨留徑草待王孫此例酷似劉長卿
然明百家詩白石訪子虛明樓詩云登高渾漫賦何意
萬人傳白石詩其可量乎
列朝詩集嘉靖初唐應得陳約之反北郡之弊變為
初唐之體後乃稍變為中唐子木之風調得之皇甫
兄弟漸摩者居多
田按子木與皇甫兄弟襟契不淺子循寄蔡衡州詩
云日日江頭聞送客空於詩卷恨錢郎自注云唐人

鷄鳴寺

贈送卷內以不得錢起郎士元詩為憾子昔與子木在南省時頗類此子木哭子安詩云五字沈吟詩品絕一官樵悴世途難時人以爲定論子木五律頗類皇甫第才不及耳

龍山開古寺長傍紫微天地近多來客心空不礙禪虛窗遠
岫出上界一燈燃落日回廊轉松關深暮煙

送王生還楚

來預看花候歸逢度雁時春風留客久寒雨獨行遲煙樹吳
關外鄉園漢水湄平生楚遊意因子憶江蘼

寄題王生艾齋

知爾歸棲處青山帶急流看雲江上宅聽雨竹間樓憑几開
遺帙鳴絃寫獨愁美人思報遠猶及楚蘭秋

題峴山濟公房

禪榻澄湖上山光似鏡中疏鐘搖落葉細雨帶秋蟲峯竹虛
窗映爐香別院通何期碧雲合一酌對休公

自瑞洪沂江入信州

暫得辭文牒虛窗畫舫開江趨鄱口落山向信州來接樹迷
帆入殘鶯喚夢回無人共登眺翹首越王臺

秋夜寄懷皇甫少玄

湖上楓林露氣清懷人逢夜月同明春征忽漫逢秋序越信
何因到楚城山帶石頭亭嶂出潮回京口海天平從來謝眺
吟詩地無限江淹恨別情

哭皇甫子安

與君闕下共彈冠翰墨筵中更結歡五字沈吟詩品絕一官
憔悴世途難清琴欲鼓含愁斷短札猶存掩淚看詞客招魂
終渺邈獨慙作諫似潘安

芙蓉閣

江東有靈窟梁代無僊才空留芙蓉閣遊客稱蓬萊

春江詞

溪流清且淺雲山斷還續為唱濯纓歌聊和江妃曲

度熊飛嶺

衡南那復見來鴻嶺路高盤赤石叢百里連岡山縣小人家

都在夕嵐中

王梅四首

梅字時魁平湖人嘉靖壬辰進士選庶吉士改刑部

主事謫判滁州有柘湖集

王文祿文脈王柘湖詩企盛唐大復之續也
野獲篇平湖王梅嘉靖壬辰選庶常初進館赴閣試
長安新秋感與詩云鵲樓高灝氣橫堯萱商律又
敷榮六龍扶日明華袞五鳳騫雲薄太清西北烽煙
新人警東南民力未忘情青袍際遇渾無補退食遲
遲愧友生當時以為第一後授官止得主事
橋李詩繫柘湖詩歌清深老健迴然塵壒之外
靜志居詩話柘湖風神韶亮得無累之神絕句小詩
尤見情拔

寄石汀王先生二首 有引

石汀先生按浙梅時為諸生雅承休盼斗筲黃鐘計
偕一見睽離至今風搖心旌川回目練晤言未期沈
憂空積觸事宣懷言無倫次聊軫疇昔俟諸將來耳

苦憶王夫子清時賦考槃三年不相見一札阻長安蘭雪留
彤管雲山照鐵冠因風泛瑤瑟情竭賞音難
十年萊子服數口汶陽田荷篠深山裏銜杯曲水前春蘿搖
石月夕鳥下汀煙最是論文友時時詣鄭玄

在滁州與韓侍御魯涼卜築豐山東麓

知爾亨途久息機不妨高卧共巖扉山雲半落烏皮几池月
涼分白苾衣抱病秋來行藥倦故人天上尺書稀疏慵自缺
經時畧浪說東南有少微

涼州曲

記得行時約言從上黨遊昨傳書信至三歲在涼州

程璠二首

璠字子彬德州人嘉靖壬辰進士授覃懷推官累官
尙寶寺卿以忤嚴世蕃左遷起參政遷江西布政使

有右丞集

張九一綠波樓集右丞近體本之才情傳以色澤瀾
風洋洋復見正始之音
田同之安德明詩選遺子彬詩協唐音九工五律

人日辰州道中

旅客逢人日江關信馬蹏春光微冉冉草色已萋萋驛道通
三楚風煙接五溪誰能將柏酒一爲解羈棲

晚赴宿州

亂山驅獨馬返照入寒林重以碧雲合淩其游子心疏籬隔
吠犬灌木集鳴禽獨有孤飛雁哀鳴意不任

棧道

地險襟喉會川流南北分千峯兼萬壑匹馬逐孤雲黑水蛟
龍窟青林虎豹羣不堪巉絕處天日又西曛

趙伊 五首

伊字子衡平湖人嘉靖壬辰進士授刑部主事改南
兵部歷員外郎中出為廣西按察副使有序芳園稿

二卷

田按子衡初與皇甫子安兄弟蔡子木王維楨談詩
及官南郡與湛甘泉鄒東廓羅念菴講學詩特輕脫
時近宋派

贈西橋楊君

河橋連草屋深郭此幽棲釣艇近門繫囊琴過客攜夕陽分

遠樹春水會前溪老况存詩景看雲日杖藜

泛湖

出門理棹即湖中竟日淹留興未窮鏡水已應歸賀老習池
能免醉山公雨餘江柳迎人綠秋近園葵對酒紅朋舊追隨
真率在揮金遠慕二疏風

次友人秋夜獨坐

莫向浮名問是非乾坤落落更誰私爭妍樹木底心性逐化
魚龍自歲時草閣琴書秋正爽江城鐘鼓坐來遲懸知對月
忘懷處風竹蕭蕭入夢思

夏日偶坐

草色侵階映綠滋濛濛細雨暮光遲北牕高枕此何意新竹

過牆還幾枝杯酒於人休作惡交遊何處好相宜湖山見說
添形勝消得閑來兩鬢絲

和鶴椿移居韻

卜居負郭草堂靜曲浦石橋何處村幾箇沙鷗來近渚一鉤
林月挂黃昏入城小艇省徒步寄友新詩代面論七十老翁
怡老地大椿巢鶴子還孫

錢薇 二首

薇字懋垣海鹽人嘉靖壬辰進士除行人擢禮科給
事中轉右給事中隆慶初贈太常少卿有承啟堂藁

二十九卷

新茶

欲向陽羨游春雨阻行楫山僧攜滿籠門前挂青笠

贈高卿

澗山湖邊客舫來尋曲徑煙蘿風雨連朝離思一尊子夜吳

歌

庚戌虜警

薊門寒色敞高秋易水蕭蕭咽不流聞道北門虛鎖鑰左賢
關騎下涼州

吳嶽 二首

嶽字汝喬汶上人嘉靖壬辰進士授戶部主事歷郎
中出爲廬州知府改保定歷山西副使浙江參政湖
廣按察使山西布政使以右僉都御史巡撫保定改

貴州進左副都御史協理院事歷吏部侍郎遷南禮
部尚書就改吏部贈太子太保諡介肅有望湖遺稿
海嶽靈秀集冢宰詩雋逸清灑入盛唐蹊徑

別二司諸公

寥廓江天遠淹留畫舫移離觴催暮景歸棹劇鄉思泛梗年
來倦投簪老去遲憑君一盡興回首各差池

舟中感懷

百丈牽風上瀨遲杪秋霜露劇鄉思蕭條已負黃花節搖落
空看楊柳枝細雨孤舟還隱几暮雲寒笛漫傾卮羈懷正苦
未消歇隔岸誰歌白紵辭

朱衡

衡字士南萬安人嘉靖壬辰進士除尤溪知縣改婺
源徵授刑部主事歷郎中出爲福建提學副使累官
山東布政使以右副都御史巡撫山東召拜工部侍
郎進南刑部尚書改工部總理河漕加太子太保有

鍾山集

宿眷野齋偶題

玄泉臨巨壑危石削層臺野鳥機都息寒松手自栽時因尋
藥往日爲看雲來向夕春風至雙扉忽自開

范欽二首

欽字堯卿一字安卿鄞人嘉靖壬辰進士除隨州知
州徵授工部員外出爲袁州知府遷江西按察副使

累官右副都御史巡撫南贛遷兵部侍郎有天一閣

集

甬上者舊集侍郎解組歸時郡中東沙張公竹墟屠公亦以事廢里居投閒嘯咏人稱為東海三司馬侍郎居在兩湖深處舍經宿曲林木翳然性喜藏書起天一閣盡購海內異本列為四部與吳門王鳳洲家歲以書目取較各鈔所未見相易故浙東藏書家以范氏天一閣為第一
靜志居詩話堯卿格律自矜第取材太近時倡和者沈嘉則呂中甫諸人未免聲調似之

汎東湖

澄波四望空畫舸沂洽風野寺輕鷗外人家細雨中菰蒲臨水茁洞壑與天通卽擬尋真去桃花源杳未窮

懷呂中父上黨

長年依帝子何似漢枚乘結客惟三晉遊人伴五陵月中催

授簡雪裏罷呼鷹會念林遊者風前思不勝

林應亮 一首

應亮字熙載侯官人知府春澤子嘉靖壬辰進士授禮部主事歷郎中出為常德知府遷江西副使歷參政按察使布政使以右副都御史總理河道進戶部侍郎總督倉場有少峯集二卷

彭城懷古

碣石開重險江城枕上游雄圖山北鞏王業水東流碧草留侯廟荒林亞父邱晚來橫笛起猶帶楚歌愁

蘇志皋 四首

志皋字德明固安人嘉靖壬辰進士除瀏陽知縣改

進賢徵授刑部主事歷員外郎中出為廬鳳僉事歷

山西參議陝西副使謫河州知州遷陝西僉事歷山

西副使陝西參政山西按察使進布政使以僉都御

史巡撫遼東進右副都御史有寒邨集四卷

列朝詩集右都才情富麗沾沾自喜好作長短句
田按寒邨詩風調自佳北平詩人品在頓鷗汀之女

孤雁

寒空一雁度孤影落橫塘莫妬隄邊鳥鴛鴦本白雙

扁舟圖

蘆花點綴楚山青江平舟穩夢初醒浮雲捲盡暮天碧歸雁

數聲秋冥冥

採蓮曲

彭蠡湖中南韻船女郎作伴採秋蓮含羞唯恐傍人見撐入

蘆花洲子邊

初夏寄題隆興寺禪房

葡萄引蔓棗開花臺殿參差日影斜一客不來雙燕落老僧

閒白曬袈裟

周復俊一首

復俊字子籲太倉州人嘉靖壬辰進士授工部主事

歷員外郎中出為四川提學副使改雲南歷四川雲

南布政使進南太僕卿有涇林集八卷

靜志居詩話子籲甄綜鄉黨之詩為玉峯詩纂而以
已詩請楊用修評點亦稱好事第諸體多膚淺不足
觀

寒江

千林暝若空遙峯隱還見嵐雲凍不飛江水明素練

浦應麒 一首

應麒字道微無錫人嘉靖壬辰進士選庶吉士授編修進春坊左贊善有后巖詩藁

碧山社次答俞廉訪

雨餘新綠布繁陰旋覺山堂花木深酒送行廚來畫舫茗攜僧供出珠林翠竹筍千竿玉黃惜枇杷一樹金日午鶯聲嬌百轉可能無意勸同斟

顧存仁 一首

存仁字伯剛太倉州人嘉靖壬辰進士除餘姚知縣

徵授禮科給事中以言事廷杖編管保安隆慶初起南通政司參議遷太僕寺卿有東日草堂集四卷

西路出紫荆關

萬山急水度浮圖名胡騎曾茲犯帝都每飯豈宜忘鉅鹿防秋先合塞飛狐雄關虎踞神州迴羣隘星羅孔道孤落日獨懸戎馬淚杞憂誰為達天衢

包節 一首

節字元達松江華亭籍嘉興人嘉靖壬辰進士授東昌推官徵授御史以劾中官廖斌下獄遣戍莊浪衛有侍御集六卷

歲暮詠懷

凜冽歲云暮逝節何駸駸幾歷玄冥雪渺邈天山陰荷戈未
息肩年鬢日以侵登城望故鄉睽隔如商參援琴欲鼓之恐
使淚沾襟

白悅一首

悅字貞夫武進人嘉靖壬辰進士除戶部主事改禮
部歷員外郎中遷左春坊司直謫永平通判歷南後
軍都督府經歷吏部郎中再謫河間通判遷戶部主
事改尚寶司丞出爲江西按察僉事有雒原遺集入

卷

四庫總目悅爲尚書昂之孫家世累貴而獨刻意學詩
句調華瞻神理頗清神當時發績者差勝特格律未
能變化往往雷同
司勳集雒原集調陽助而思沈語婉麗而致遠音和

平而易感旨雋永而難數
國雅司直詩如明月等篇出建安風骨兼貞觀思致
故宗子相謂總之詩不離唐五言者最乎
田按雒原詩特俊爽惜不得其全集錄之

卧病官齋懷王江南

春色灑灑滋春愁夢思故園沙棠舟三星在戶美人遠浩月
澄河空夜流燈花照酒獨看劍短笛吟風誰倚樓同時相聚
不相樂相思莫漫相悲秋

謝少南一首

少南字應午上元人野全先生承舉子嘉靖壬辰進
士除南刑部主事遷春坊司直歷廣西提學僉事陝
西提學副使河南參政終布政使有河垣稿謫台稿
粵台稿

少室赴蒼梧賦贈時有交南之役少室著議及之

最愛平黎策無論論蜀文相如元重漢馬季故能軍江外傳
烽火關南結陣雲誰知樽俎地制勝萬夫羣

廖希顏

六首

希顏字叔愚茶陵州人嘉靖壬辰進士除高安知縣

遷工部主事歷郎中出爲山西提學副使遷浙江按察使有思復堂稿四卷

沉湘耆舊集叔愚詩才俊爽評者謂其繼西涯龍湖而起殆不誣也

田按叔愚七律氣格軒舉

訪王吏部北郭園

瀟灑王吏部好爲人所難忤俗豈忘世上書甘罷官灌園北

郭裏結社龍門灘一榻青山外逢人白眼看

別郭漸齋

西省官聯同憲節故鄉笑語共遐方正愁戎馬徵書急况復
風煙別路長絕塞浮雲過梁戟高城華月影桃榔粵南冀北
能相憶爲寄天邊雁數行

題南山卷應潞邸教

三年爲客向并州兩見南山屬暮秋宋玉多愁應有賦梁王
高興幾登樓爐煙孔雀新屏上花氣芙蓉別殿頭今日賡歌
樽酒裏瑤池豈少報應劉

次韻答澄江憲伯

坐逢伯仲樽常滿愁入邊關思轉深白草連天還雪色黃雲

絕塞已秋陰長裾曳履成何事尺組丸泥違寸心十載自憐
通籍早人前徒解郢中吟

立夏

灌木陰陰黃鳥嗚高齋兀坐思淒淒庭前生筍半成竹道上
飛花盡作泥人生幾何春又夏世路那堪東復西清吟淺酌
且自慰芳草天涯甯久迷

遊雁宕

中峯石戴七星芒拄石青藤九尺長四十八盤天上路東邊
回首是扶桑

李徵一首

徵字誠之常德桃源人嘉靖壬辰進士累遷禮科給

事中出爲江西按察副使遷浙江參政有元光漫稿
五卷

秋夜雨花堂對月

秋月禪心相對清露華飛墮葛衣輕爐熏茗椀煙初歇坐聽
遙空雙鶴鳴

王廷幹一首

廷幹字維楨涇人嘉靖壬辰進士除行人遷南刑部
主事改戶部歷員外郎中出爲九江知府有巖潭集

田按皇甫子循上大司徒書云廷幹與越郡蔡汝楠
並以弱齡漸翼鴻逵雙曜麗采馳聲藝苑雖終賈復
作嚴路再生茂以加焉亦友朋假藉之詞耳今核所
作殊不盡然

駕出長安

聖后乘時豫鸞車出漢宮雕戈明曉日寶幟拂晴虹輦轂謳歌起山川畿甸雄侍臣徒仰德拜手奏南風

沈越一首

越字中甫南京錦衣衛人嘉靖壬辰進士除羅田知

縣改平江徵授山東道御史謫開州通判歷衛輝推

官德安同知有麓村詩草新亭漫稿

金陵瑣事沈韓峯越工小令鐵面御史能為風流輒媚語賦梅花者豈獨宋廣平乎

懷方孔明

梅花吹雨日連牽綠漲陂塘已拍天為念故人生計薄一篙

春水種湖田

秦鳴夏一首

鳴夏字子亨臨海人嘉靖壬辰進士選庶吉士授編

修進中允以事罷歸起兵部主事

送胡龍山別駕

君行不可留綠柳暗江頭春色隨征旆浮雲生暮愁孤衷懷

楚壁壯志拂吳鉤湖海他年夢能忘天姥遊

姚虞一首

虞字宗舜莆田人嘉靖壬辰進士官御史有焚餘詩

集

洗少汾讀書臺

卜築煙霞外幽棲豈避名小窗時讀易竹院每逢僧倚閣峯相對當秋月自明閒雲來洞口盡日鎖柴扃

高應冕

五首

應冕字文中仁和人嘉靖甲午舉人授綏甯知縣遷

光州知州有白雲山房集

國雅高光州文中才致清贍聲調道捷平平寫出亦自沈淨如黃鳥歌聲悲秦亡自此始濤捲海門山雪橫天際鳥經聲出院少草色上階多是中唐語田按文中五字詩清穩有韋王遺意歸田後與閩縣祝汝亨時奉新安王仲房寅錢唐方禹績九敘童侍良漢臣仁和劉安元子伯沈懋學仕結社於西湖曰紫陽湖心王岑飛來月巖南屏紫雲洞香凡八社今所傳西湖八社詩帖是也

靈峯寺訪少岳張山人不遇憩聽泉石

山秋鬱蒼蒼禪林轉幽寂因躡靈峯雲偶憩聽泉石泉流何
清冷石古苔蘚碧洗心悅真境松風引孤策何處覓知音還

候山中客

憶中峯舊遊寄問賓竹上人

幾年別中峯羣山宛在目松濤帶江聲石門轉谿曲不知舊
遊徑新長幾竿竹可有殮霞人還過白雲宿

舟宿江口

煙水洞庭秋蒼茫日沈夕潮落江聲迴鳥下雲林急月高漁
未歸山昏寺鐘寂獨憐沙上鷗忘機同野客

湘潭發舟宿武陵望桃源

解纜浮湘浦春帆帶晚霞還隨洞庭水又宿武陵花歸夢楚
雲斷聽歌山月斜桃源空極目何處是僊家

同茅鹿門賓山上人雲房晚步

披襟鹿門客攜手虎谿僧同步山中月長吟石上藤流雲時

護竹宿鳥夜窺燈萬籟此俱寂聞鐘去未能

陳芹二首

芹字子野系出交南國王永樂中避黎氏之亂來奔家南京嘉靖甲午舉人授崇仁教諭遷奉新知縣改

甯鄉存子野集鳳泉堂集

玉筍詩談子野為令九十日解印歸卜居鳳泉之左又構別業新林浦時垂綸其上浦有橫厓因自題曰橫厓小隱又即邀笛步為閣其上云邀笛閣而引騷人倡咏為樂嘗取古高士自巢許而下迄於宋元得七十餘人為之詩以自見其志號思古吟烏衣佳話子野墨竹花草絕無俗氣文徵仲稱其竹枝清氣逼人戒門下士到金陵不可畫竹金陵有人蓋指子野金陵瑣事橫厓陳子野書法鍾王俊逸可愛列朝詩集海宇承平陪京佳麗仕宦者誇為仙都游談者指為樂土弘正之間顧華玉王欽佩以文章立埤徐子仁陳大聲以詞曲擅場江山妍淑士女清華

才俊歛集風流宏長嘉靖中年朱子价何元朗為寓公金在衡盛仲交為地主皇甫子循黃滔父之流為旅人相與授簡分題徵歌選勝秦淮一曲煙水競其風華桃葉諸姬梅柳滋其妍翠此金陵之初盛也萬曆初年陳甯鄉子野解組石城卜居笛步置驛邀賓復修青溪之社於是衡仲交以舊老而益盟幼于百穀以勝流而至止厥後軒居紛還唱和頻雖詞章未爛大雅而盤游無已太康此金陵再盛也子野少嘗夢入山中石梁跨道瀑布洒空洞中二老僧跌坐周繞木闌以防虎後游天台山洞宛如夢中木闌猶在問之士人云老僧化去久矣自是恍然省悟專精內典作和寒山子詩序金陵社集攷之未得其詳靜志居詩話自隆慶辛未而非萬曆初年也朱秉器青溪社集倡自隆慶辛未而分與秦淮合富桃葉淮停雲小志云青溪自後湖分與秦淮合富桃葉淮清之問有邀笛步晉王徽之邀桓伊吹笛處也陳明府芹即其地為閣焉俯瞰溪流頗有幽致歲辛未費參軍懋謙約余為詩會其上於是地主則明府次則唐太學資賢姚典客胡民部世祥華廣文復初鍾參軍倬黃參軍喬棟周山人才甫盛貴士時泰任參軍夢榛先後游而未入會者則張太學巖翼金山人鸞黃山人孔昭梅文學鼎祚莫山人公遠玉山人

寅黃進士雲龍夏山人曰湖紀亳州振東陳將軍經翰
汪山人顯節汪文學道貫會沈太史懋學程文學
應魁周文學時復癸酉復為續會則吳文學子玉魏
廣文學禮莫貢士是龍邵太學應魁張文學文柱每
月為集遇景命題即席分韻同心投分樂志忘形間
事校評期臻雅道會錄詩若干刻之命曰青溪社稿
許石城先生敘其首續會錄詩若干吳瑞穀敘之會
余領渝郡符任參軍入興都稿遂散逸後方民部沈
葉山人之勞入焉余馳書社以期稍收輯無何胡民
部費參軍以註誤謫黃參軍以領郡行已方民部亦
因事出盛會不常良朋星散回首江東雲樹在望秦
淮煙月閣爾銷魂因紀舊遊畧次其姓氏篇什如左
也按此青溪社集之本未始備錢氏未見秉器小志故

喜諸君子入青溪社

邀笛亭前舍釣竿丹楓林外候金鞍吟邊綠酒秋初煖花底
幽盟久未寒才子一時追鄴下故人幾載隔雲端諸君莫更
輕離別萍迹應憐此會難

和寒山子詩

野日沈蒼煙樵徑斷人語眾山木葉下颯颯飛寒雨

王鑛二首

鑛字公範閩人嘉靖甲午舉人官思明同知有冶山

拙稿

到揚州

峭帆昨夜發高郵迢遞湖光萬頃秋殘月夢回清角曉榜人
來報是揚州

宿荆南普明寺

歇馬叩禪關浮生得暫閒龍堂寒月上虎渡宿僧還梵磬發
清籟曇花照古顏應憐此信宿無夢向塵寰

薛欽 三首

欽字寅甫懷安人嘉靖甲午舉人官太平教諭有薛

博士集

林嫌嘉靖福州府志教諭薛欽舉人謝啟元徐拱葉麟俱有詩名
靜志居詩話薛君詩頗清越近於皆山樵者曹能始序徐惟和詩云聞自林膳部後百餘年而得鄭考功又數十年而得薛博士其推重若是

隴頭水

不向樓蘭戍那經隴水頭聲將金閣恨流作玉關愁月暗聞
笳夕風淒選騎秋猶聞嗚咽處更在海西樓

送林天宇之桂陽

自昔衡陽外傳聞少雁過別君從此去無那故人何叢竹行

難盡清猿聽漸多相思杜蘭夕秋色滿湘波

黎陽道中有懷



河上秋風至蕭蕭不可聞蟬聲下高樹雁影出重雲古道蒼
煙斷平田綠水分自能悲宋玉况是惜離羣

謝啟元 一首

啟元字本貞閩人嘉靖甲午舉人

經臨城廢縣

縣荒名不改城壞土猶存寂寂南塘路悽悽北郭門桑麻空
滿市槐柳半成村尚有龐眉叟能談廢置原



庚金卷十六



